

皇

明

史

概

皇明大事記卷之四

朱國禎輯

平中原西北

吳元年九月平姑蘇十月庚申召諸將議北伐甲子命
信國公徐達爲征虜大將軍鄂國公常遇春爲副將軍
率甲士二十五萬由淮入河北取中原是日 上親祭
上下神祇於北門之七里山因召將士諭勉之丙寅檄
齊魯河洛燕薊秦晉之人丁卯大將軍兵至淮安明日
遣人至沂州諭王宣父子已巳戒飭廬州等處嚴備王
保保弟脫因帖木兒等辛未王宣子王信納款且奉表

賀平張士誠

上遣使授信行省平章聽大將軍節制

二人陰持兩端

上密諭大將軍宣父子詭詐宜勤兵

趨沂州觀變十一月丙子大將軍次下邳遣都督同知

張興祖徃徐州進取山東己卯大將軍至榆行鎮元僉

院鄺毅等皆降初

上遣徐唐臣等諭王宣從征宣不

欲行令信密徃莒密募兵爲備佯來犒師大將軍受而

遣之既還卽叛唐臣走脫大將軍卽日進兵討之遣梁

鎮撫徃諭不聽灌水急攻宣出降令宣爲書遣鎮撫孫

惟德招信被殺信與兄仁走山東大將軍以宣反覆戮

之諸縣皆降庚寅諭大將軍向益都分精卒扼黃河斷

援兵庚子克滕州至臨朐元將丁玉明遁去尋來降兵至益都因遣王明入城諭平章老保等不下辛丑填壘力攻拔其城執老保等普顏伯花不屈死徇下壽光臨淄昌樂高苑等縣及濰膠博興等州十二月淄川等縣皆降張興祖至東平元平章馬德棄城遁追至東阿元叅政陳瑋等以五萬餘人來降衍聖公孔希學等迎見兗州以東州縣皆降戊申宋廸使山東還言孫興祖所降將士數萬皆令領舊兵與俱進取上慮臨敵生變凡降將及官吏可用者悉送京師大將軍至章丘守將右丞王成降己酉至濟南平章達朶只兒進巴以城降

尋送京師殺
使者北走

庚戌張興祖至濟寧官吏先遁入守之元
將邵禮以密州兪勝以樂安降命中書省榜諭山東亡
將散卒及歸正人鄒平蒲臺皆降大將軍自濟南復還
益都分兵取登萊諸處皆下之

洪武元年正月萊陽守將世家寶納款丙申大將軍復
如濟南己亥遣使至登萊諭祭海神庚子以鄧愈爲征
戍將軍取南陽以北未附州郡二月癸丑副將軍克東
昌元平章申榮自經死丁巳遣康茂才從北征樂安兪
勝復叛進兵討之勝遁去城降元丞相也速來戰大敗
之三月丙戌大將軍至濟寧衍聖公來見送京師是日

開耐牢壩引舟師由鄆城趨汴梁丙申鄆愈進兵南陽
克之擒蔡國公史克新等大將軍至陳橋左君弼竹昌
迎降遂入汴城守將李克彞遁去甲辰大將軍自中潁
取河南陳德守汴梁四月大將軍由虎牢關進至塔兒
灣元將詹同脫因木兒以兵五萬來戰大破之平章梁
王阿魯溫以城降泰寧之父左丞趙庸守之壬子副將軍至
嵩州降之鞏縣均許陳汝皆降遂取陝州康茂才守之
甲子 上諭諸將已克潼關勿遽西是日 上發京師
召大將軍等來會謀取元都馮宗異進攻潼關李思齊
張思道皆遁引兵而西華州自潰五月大將軍至陝州

益兵以郭子興守潼關大將軍書諭擴廓帖木兒遣兵
至魏州取毛胡蘆山寨遂與馮宗興俱還河南擴廓報
書及馬庚寅上至汴辛卯副將軍入見勞之乙未辭
還河南丁酉以何文輝守河南六月庚子朔大將軍入
見勞之定計取元都癸卯辭還河陰遣任亮守嵩州副
將軍至軍中發兵次陳橋七月己巳鄧愈至隨州守將
王誠等皆降壬申嵩進征圖賜大將軍糧艘俱集濟寧
餽運乙卯勅會兵東昌北征己丑康茂才自陝州渡河
徇安邑等縣皆降之辛卯大將軍等自陳橋入辭丙申
駕發汴梁右副將軍馮宗興留守山賊劉士原寇汝州

何文輝遣兵討破之丁酉大將軍檄諸將大會東昌分
布士馬渡河間七月己亥朔遣使犒北征將士庚子大
將軍發汴梁徇取河北遣薛顯傳友德取衛輝元平章
龍二走彰德降將喬院判叛於濟南指揮陳勝討平之
癸卯師至彰德龍二復出走降其城右丞梅思祖守之
乙巳至磁州丙午至邯鄲守將遁去丁未至廣平元平
章周昱先遁去是日薛顯獲元貊邦傑部將侯僉院等
那降爲玉保仔所破妻
子在趙州者悉殺虜 己酉大將軍次臨清遣人往東
昌促張興祖樂安徽華雲龍皆以師來會庚戌傳友德
獲元舊將李寶臣等爲鄉道遂遣友德開道通步騎顯

時浚開通舟師壬子副將軍取德州癸丑大將軍自臨
清會師至德州命韓政守東昌并鎮撫臨清戊午下長
蘆遂下清州至直沽獲海舟七艘作浮橋濟師並河東
西以進元丞相也速擇海口望風遁去癸亥至河西務
元平章俺普迎戰大破之擒知院答剌孫進至通州夾
河而營乙丑元國公知院卜顏等來戰大破擒之丙寅
遂入通州華雲龍兵來會是夜三鼓元主開建德門北
走八月二日庚午大將軍進師元都至齊化門填濠入
城執其監國淮王帖木兒不花左丞相慶童平章迭兒
必失朴賽因不花右丞張康伯御史中丞滿川等戮之

并獲宣讓鎮南成順諸王子六人及玉印璽寶器圖籍
封故宮殿指揮張煥以千人守之妃主宮人令宦寺護
視人皆安堵明日順德守將來降獲前樂安叛將俞勝
分薛顯傳友德曹良臣顧時巡邏古北諸隘口遣故元
尚書九住還太原告諭擴廓癸酉大將軍以鎮撫吳勉
攝大都路府事檄韓政自東昌分兵守廣平陵川華雲
龍經理故元都城楊鎮撫守直沽傳友德守蘆溝橋而
前七月辛酉襄陽指揮王遇成進攻元石腦寨破其五
棚知院何政退保光石寨又明日攻破之擒其樞副張
成等六十人斬之葉舞陽魯山等縣相繼降辛巳大將

軍獻捷表至京壬午稱賀改元都爲北平府徵元故官
送京師 駕發京師幸汴梁改爲開封府稱北京癸未
詔大將軍置燕山六衛于北平留孫興祖華雲龍守之
進兵取山西湯和爲偏將軍與平章楊璟俱從西征薛
顯至古北口獲元潰卒戊子薛顯傳友德等畧大同壬
辰指揮曹諒克裕州臬白素擒元平章郭雲故元留守
迭里迷失謀亂捕獲戮之甲午右副將軍馮宗異從征
九月張興祖下永平傳友德至大同獲元僑左丞等甲
子副將軍發北平下保定中山府十月戊辰朔 駕發
北京大將軍檄劉聚守河間己巳副將軍克真定元平

童孫克義來降達魯花赤敏納賜彰先聞都城破具朝服登城兩崖上再拜投鎗下死馮宗異湯和抵懷慶守將白瑣甘遁去其城千甲至太行山砦子城破其羽癸酉取澤州守將賀宗等皆先遣留兵戍守懷慶將韓林兒來攻平童端景來攻張彬往援之遇韓店大戰不利甲戌元左丞王某自河內攻潼關郭子興擊却之丁丑上至京師宗異和取潞州大將軍分兵守雄州霸州癸巳傅友德下平定州一月四日辛丑大將軍發北平丁未會副將軍於真定遣趙庸守保定趙興貴守通州王成守德州韋正守真定癸丑薛顯追元脫

因帖木兒石州大敗之仍與傅友德畧平定州丙辰
大將軍自真定下井陘戊午康茂才克河中大將軍師
度固關至平定州滿太原偵騎十五人分兵扼榆次叅
政傅友德守平晉密遣醫士往潞州督馮宗異會師都
愈討蜀河奔張獲之金陂均房之地悉平定十二月丁
卯朔大將軍克太原初元主北奔命擴廓帖木兒自太
原復取舊都兵出懸門尋出保安州經居庸關以攻北
平大將軍謂諸將曰王保保率師遁出太原必虛北平
孫春官六衛之師足以鉗禦我乘其不備直抵太原領
軍則彼進不得退無所依此兵法所謂批亢搃

虛也若彼還兵來救則已爲我牽制進退失據必成擒矣諸將皆曰善遂引兵徑進擴廓至保安州聞之果還軍其鋒甚銳副將軍曰我騎兵雖集而步兵未至未可與戰莫若遣精兵夜襲其衆必亂主將可縛也會其將豁鼻馬約降且請爲內應遂伏兵營側分道夜掩之擴廓方然燭坐帳中兩童子執書以待衆覺變擾亂擴廓倉卒不知所出亟納靴未及竟蹠一足踰帳後出乘驛馬從十八騎遁去迨旦豁鼻馬遣其子來報大將軍勒兵進營于太原城西受降得人馬各四萬擴廓奔大同副將軍以兵追之至忻州不及而還擴廓遂走甘肅庚

于薛顯等擊賀宗哲于石州諸山寨以次降定因遣兵
守石嶺天門二關壬午馮宗異克絳州大將軍會兵太
原遣兵取榆次關以通潞州分兵介休平遙陽曲等處
討捕山寇皆克孟州復叛據乾河口寨

洪武二年正月丁酉指揮曹崇等討紅蓮山寇平之大
將軍遣指揮張煥以萬人取孟州山寨檄何文輝於河
南從征遣傅友德巡太和嶺之西北顧時巡嶺之東北
甲寅副將軍自太原還師征大同兵至守將竹貞棄城
走大將軍令已獲軍士不許殘虐人民皆與完聚毋得
擾害孟州平乙丑薛政攻下蟻尖寨

在德林庵
川最險者

二月

大將軍集諸州芻糧于大同以張興祖鎮守副將軍自大同如太原沂州逃將王信等執送京師戊寅諸大將發太原庚辰元丞相也速侵通州曹良臣設疑兵驚駭之遁去追至薊州而還大將軍自霍州至平陽薛顯來會辛卯發平陽次河中造浮橋副將軍先渡河趨陝西三月乙未朔大將軍自蒲州渡河蒲城將士皆遁入守之并守鄜城進次櫟陽自鹿臺趨奉元初李思齊據鳳翔張思道駐鹿臺以衛奉元及大兵入關思道等先三日遁去大將軍遣郭子興直搆奉元自率大軍繼進渡涇渭至三陵坡父老千餘迎降遂按兵令左丞周凱先

入撫諭明日整兵入城改奉元路爲西安府以夏德潤

署府事

師之至鹿臺也元陝西行省平章哈麻圖素奉元走藍屋爲民兵所殺平章歪頭西臺治書侍

御史王武選去復降斬之西臺御史桑哥失里守關家洞遣兵攻之勢窮促不屈與妻子俱投崖死左丞拜泰古逃入終南山郎中王可仰藥死檢校阿失不花自經死三原縣尹朱春謂其妻曰吾當以死報國妻曰卿能盡忠妾豈不能盡節亦俱投崖死副將軍進兵鳳翔李思齊全部西奔

辛亥大將軍造咸陽橋以耿炳文守陝西引兵繼發承

制命楊璟征唐州亂兵四月二日丙寅大將軍在鳳翔

議所向諸將咸以張思道之才不如李思齊慶陽易於

臨洮欲先由幽鳳取慶陽然後從隴西攻臨洮大將軍

曰不然慶陽城險而兵悍未易猝拔臨洮之地西通將

夷北界河湟我師取之其人足以備戰鬪其土產足以
供軍儲今以大軍威之思齊不北走胡則束手就降矣
臨洮旣克旁郡自下諸將然之乃留湯和守營金興旺
等守鳳翔遂移師趨隴州 上遣使卽軍中召副將軍

還北平取逆北餘寇丁卯大將軍度隴州次 固關以

王敬祖權隴州庚午進至秦州守將呂德等遁去追獲
之遂入伏羌取寧遠至鞏昌其平章梁子中總帥汪靈

真保等皆降移郭子興守之馮宗異征臨洮丁丑李思

齊來降

上初以書諭之有降意其養子趙琦與麾下給

之入蕃遂奔臨洮琦等私賣貨婦女匿山谷間

思齊遂窮蹙至是大兵至出降琦亦相繼來歸宗異遣

宣使張本中報捷京師大將軍遣韋正及趙琦等守臨

洮

卷一百一十五

一

洮州申臨洮捷奏至 上遣使諭大將軍李思齊已降
未知慶陽寧夏攻取何如張思道兄弟譎詐若其來降
善防之乙酉大將軍至靖寧州守將遁去徇下隆德縣
明日師度六盤山至開城謀報元豫王駐西安州襲走
之盡獲其人馬五月四日丁酉大將軍出蕭關下平涼
盡收未附山寨進克延安初張思道在慶陽聞克臨洮
懼而走寧夏使其弟良臣代守既至寧夏爲懷靡所執
良臣聞之遂以城降大將軍發平涼至涇州戊申張良
臣復叛大將軍謂諸將曰 上明見萬里外今日之事

果如所料會兵討之先遣兵抄其出入之路俞通源畧其西顧時畧其北傅友德畧其東陳德畧其南六月寧州邠州皆降遣指揮陳壽守原州黃旺守涇州涇州獲慶陽小元帥諜者張五十九斬之已邠大將軍圍慶陽張良臣開西門出汲恣人馬馳騁大將軍怒督宗異進逼西門明日張良臣出戰東門顧時擊敗之獲裨將九人斬之是日副將軍克開平初上命副將軍北征以平章李文忠輔之率步卒八萬騎士一萬自北平往取聞平道三河徑鹿兒嶺過會州敗故元將江文清兵於錦州得士馬數千次全寧故元丞相也速復以兵迎戰

又大敗之進攻太興州文忠謂副將軍曰元兵必走乃分兵千餘爲八屯伏其歸路虜果夜遁遇伏大破之擒其丞相脫火赤遂率兵追新開嶺進攻開平元主先已北奔追北數百里俘其宗王慶生及平章鼎往等斬之薊北悉平辛巳大將軍攻慶陽別將李德明還環州獲其謀竹符竹箭思道理問也自寧夏來覘獲而斬之分兵守彭原張良臣自西門出兵挑戰我兵少却遂薄指揮張四營堅壁禦之馮宗異兵至乃退遂命陳德守西門傅友德會兵慶陽城下庚寅慶陽大雨雹山水泛溢良臣出戰大敗七月良臣戰敗求降不許己亥副將軍

常遇春還軍次柳河川辛詔平章李文忠領其衆辛亥
王保保部將韓札兒破原州指揮陳壽等俱沒大將軍
聞之以驛馬關當衝要遣右丞徐禮守之指揮谷真守
彭原韋正守邠州馮宗異西臨驛馬關扼原州去慶陽
三十里而軍札兒復陷涇州丁千戶退保靈臺縣辛酉
馮宗異出關討札兒走之八月甲子賀宗哲寇鳳翔從
征降將審文明潛以機事報宗哲伏誅丙寅慶陽小元
帥降欲降爲良臣所囚其黨劫出之來降上命李文忠濟師合攻慶陽
行至太原聞虜衆攻大同甚急還兵援之由代出鴈門
至馬邑遇其遊騎敗之時天雨雪文忠疑有伏引數騎

往覘時已駐營去敵五十里亟前阻水爲營間道報大同元將脫列伯盡銳來攻先以兩營誘敵死戰度其饑疲分左右翼身當前鋒奮擊大破之生擒脫列伯釋與其食追至東勝州而還別部斬孔興來降甲寅遣吳禡勅諭大將軍曰如克慶陽宜令右副將軍馮宗異掌總兵印駐慶陽節制各鎮兵馬糧餉不給從長規措無致傷民輩昌臨洮蘭州諸軍鎮守如故兵不足者益之如河中四外已寧則以都督同知康茂才所部士卒三分之茂才帥其二往鎮山西凡太原諸城悉聽節制其一增守陝西務在處置得宜然後大將軍達偏將軍和回

京定議功賞俟朕與大將軍葬鄂國公畢日大將軍當復往定守邊之策戍守諸將誥命悉頒其家可諭朕意都督僉事吳禎就會同宗異駐慶陽平章李伯昇同都督僉事耿炳文守陝西庚辰陳德獲張思道部將王讓等八人送大將軍

時思道以慶陽久被圍知良臣不支遣讓持其金幣爲信言王保保已往

永昌俾以城降行至慶州被獲

癸未克慶陽初張良臣之復叛也自以

其城高險而上有井泉可據以守其兵又精悍養子七人皆善戰軍中語曰不怕金牌張惟怕七條鎗又倚其兄張思道與王保保爲聲援賀宗哲韓札兒等爲羽翼姚暉葛八之徒爲爪牙故欲據守以圖大功及王師列

營城下困之良臣不得還數出戰皆不利又遣人赴寧夏求援皆被獲內外音問不通而糧餉乏絕至煮人汁丸泥嚙之平章姚暉熊左丞胡知院葛八等知事不濟爭獻門納師大將軍勒兵入自北門良臣父子俱投井中命指揮朱杲引出斬之奏捷明日誅良臣之黨柴知院等二百餘人收其小平章等銀印以都督僉事陳德守之賀宗哲遁去先是賀宗哲攻鳳翔金興旺據守不能近乃以荆爲龜笆每五人負之連絡至城西城中投藁焚之敵輒以鐵鉤攫去復墜石壓之而敵攻不已興旺謀曰彼謂我援兵未至不能出戰也突出持之敵稍

退有頃卷營去衆欲追之百戶王輅曰彼未敗而退伏
兵誘我也乃止往覘果然敵復還攻益急衆欲棄城趨
長安興旺輅叱止之守益堅至是乃解已丑大將軍至
原州遣顧時薛顯以萬人追賀宗哲有勅召還大將
軍留馮宗異總軍事九月賀宗哲略蘭州聞王師至渡
河走十一月壬辰朔大將軍入見王保保偵知大將軍
南還襲蘭州指揮張溫會諸將曰彼衆我寡難與爲敵
然彼遠來乘暮擊之可挫其鋒不退則固守待援遂出
戰保保稍却遲明溫收兵入城敵圍之數重堅守不戰
鞏昌守將于光來援卒遇敵戰敗被執敵使諭降光大

呼曰公等堅守徐總兵將大軍至矣遂被害嘗夜二鼓敵兵將登千戶朱祐醉臥不覺巡卒擊却之溫又乘息擊破其兵擴廓嘗夜驚又聞大軍且至解去溫執朱祐欲殺之知事朱友聞諫曰當其時斬祐以徇所謂軍法今虜退行法疑于顛殺溫悟扑而釋之上聞嘉友聞直言諭長官賜綺帛錄溫功陞秩

洪武二年正月癸巳復命徐達爲大將軍李文忠爲左

副將軍馮勝

即馮宗異

爲右副將軍鄧愈爲左副副湯和爲

右副副征沙漠

上問諸將曰元主遲留塞外王保保

近以孤軍犯我蘭州其志欲饒倖尺寸之利不滅不已

今命卿等出師當何先諸將皆曰保保寇邊以元主猶在也若以師直取元主則保保失勢可不戰而降也上曰王保保方以兵臨邊今捨彼而取元主是忘近而趨遠失緩急之宜非計之善吾意欲分兵爲二道一令大將軍自潼關出西安擣定西取王保保一令左副將軍出居庸入沙漠追元主使其彼此自救不暇應援況元主遠居沙漠不意吾師之至如孤豚之遇猛虎取之必矣事有一舉而兩得此是也諸將皆曰善癸卯王保保駐兵安定縣之西殺畧邊民二月金朝興取東勝州左副將軍至興和降其城進兵察罕腦兒擒其平章竹

真三月汪興祖

即張典
祖復姓

克武州朔州戊午大將軍至定

西王保保退屯車道峴大將軍進至沈兒峪遣鄧愈直
抵其壘立柵逼之四月大將軍兵與王保保隔溪瀟而
壘日數交戰保保兵千餘由間道從東山下潛劫東南
壘壘中驚擾左丞胡德濟倉卒不知所措大將軍率親
兵急擊之乃退斬趙指揮及將校數人以徇明日出戰
諸軍爭奮大破之川北亂塚間擒王公以下千八百六
十五人將士八萬四千餘保保遁去至黃河得流木以
渡遂奔和林郭英追至寧夏不及而還械德濟送京
上以前守諸全救信州及父死事宥之勅大將軍當

正軍法毋請朝廷議功過以致威醜號令不行五月乙丑朔大將軍分遣鄧愈招土番自將取興元丁酉左副將軍敗元太尉蠻子于白海子之駱駝山進次開平平章上都等來降都督孫興祖等兵次三不刺力戰死指揮副使孫虎至落馬河與元太尉買驢戰皆死之辛丑右副將軍師趨應昌未至百餘里獲一胡騎問之曰四月二十八日元主已殂由應昌往開平報喪左副將軍卽督兵兼程以進癸卯遇元兵與戰大敗之遂圍應昌明日克之獲元主嫡孫買的里八剌并后妃諸王省院官及宋元玉璽金寶等物無算惟太子愛猷識里達遁

去親追至北慶川不及而還師過興州及紅羅山又降
六萬餘人大將軍自徽州南出一百八渡至畧陽擒元
平章蔡琳遂入沔州遣金興旺由鳳翔入連雲棧攻興
元守將劉思中迎降留興旺鎮守自還西安鄧愈進克
河州招諭吐蕃六月汪興祖巡大同北口與元將速哥
戰大敗之獲王保保弟金剛奴四大王復寇武州亦敗
走七月蜀將吳友仁寇興元金興旺擊却之明日復來
攻興旺復戰面中流矢拔矢急擊斬數百級入城固守
大將軍聞之還軍先遣傅友德竟趨黑龍江攻斗山人
夜人持十炬列龍山上友仁大驚遁去九月故元宗王

凡木赤自官山來降詔中書厚加宴勞十月命大將軍
副將軍班師十一月至京上平定沙漠表丙申大封功
臣故元主子失篤兒國舅鮒馬等來降各賜第宅五年
大將軍魏公出中路左副將軍曹公出東路征西將軍
宋公出西路兵十五萬十九年大將軍宋公征金山兵
二十萬降納答出二十一年大將軍藍玉兵二十萬至
捕魚海兒擣虜營覆之虜主遁去獲次子地保奴俱見
北虜記

任亮

任亮仕元爲同舍至正中據兵據守安陸頗以威勇聞乙巳五月關平王總大軍復襄漢部將吳福

自沔倍道徑持安陸遂擒亮以歸關平表其壯毅可用

第四葉四行

陳勝

勝隊陽人積勲陞指揮僉事吳元年從大將軍北征守禦濟南洪武元年元將喬彥院來降復作亂

勝率陣討平之斬首三千餘級二年冬賞守禦功資自

全文幣三年陞指揮同知又有同姓名者定遠人甲午塔山歸附隨湯萬戶取滁州再取和陽繼征江南摧鋒陷敵積有戰勲授驍騎左衛百戶洪武八年調贛州

衛十四年從討雲南戡定諸蠻進宣武衛正千戶三十

三年復以功陞沔州衛世指揮僉事卒子榮三十年襲

訥陝西行都司鎮夷守禦千

戶子俊永樂二十年襲榮職

戶子俊永樂二十年襲榮職

第五葉二行

張煥

煥國初爲先鋒以勇捷備侍衛給使令其見優寵命從征討累立戰功歷官指揮僉事吳元年冬從

大將軍征中原洪武元年取元都燬以兵千人守宮門
尋從征山西等處二年圍慶陽煥遷卒獲慶陽小元帥
謀者張五十九送大將軍斬之事平受賞

第七葉十五行

曹崇 字國初舉功官指揮僉事從大將軍克元都駐太
原以介休平遙等處紅蓮溝等山寇未平乃命崇
與華輝周賢王約將兵往捕未幾皆平之二年二月從
取陝西李思齊來降送入京回克慶陽明年從征沙漠
軍定西襲欽德廓帖木兒營西取靈
夏至察罕腦兒及東勝等州皆有功

第九葉六行

王敬祖

敬祖國初功由百戶授總管丁酉陞興國翼分
院元帥五月常將軍遣敬祖同院判趙忠攻池

州之青陽縣是普勝出兵來拒敬祖以數十騎衝陣陣
亂衆兵未勝疾擊遂破之克其寨八月取馬駝沙十月
克常將軍取池州戊戌四月普勝復陷池州同諸將取
之從上親取婺州明年克諸暨辛丑破安慶克江州

皆預
有功

第十葉三行

陳壽

壽國初以智勇隸徐大將軍歷官指揮僉事繼征中原洪武二年從克關隴等處守原州韓札兒來

攻城陷
死之

第十二葉十五行

朱杲

杲國初預征討官指揮從取中原山西陝西破慶陽叛將張良臣據慶陽攻破之杲首入城良臣父

子方投井亟馳馬引出之
送大將軍正法遂留戍守

王宣興化縣人元末為司農掾會黃河決集民丁疏濬
宣自薦得為都事至楊市竹篾募丁夫數月間得三萬
餘人統領治河數月工成時徐州芝蔴幸徐州城宣為
招討使從復徐州授義兵都元帥守馬陵謁滕州鎮禦

還鎮沂州投宣及子信俱爲平章攻據沂州大殺掠
天兵北伐上以書諭之來降遣徐唐臣等往慰幾被
殺大將軍即日率師往抵沂州遣梁撫鎮說宣曰我即
張氏義子孫降故得至今日王平章不降何待許之梁
既還宣復閉門拒守大將軍怒急攻出降信方募兵在
外令宣爲書招之不從與兄仁走山西大舉軍以宣反
戮之

平福建兩廣

六元年丁未十月甲子 上命徐常二將軍北伐卽日
命平章胡廷瑞爲征南將軍行省左丞何文輝爲副將
軍率安吉寧國南昌滁和無爲等衛軍由江西取福建
以湖廣叅政戴德隨征湖廣叅政楊璟左丞周德興叅
政張彬率武昌荊州益陽常德潭岳衡澧等衛軍取廣
西十一月壬寅廷瑞師度杉關略光澤縣下之十二月
丁巳廷瑞師至建陽元守將曹復疇出降留指揮沈友
仁守之時湯和廖永忠等已克方國真卽命率舟師自
明州由海道取福州 上御戟門與大都督府論各處

用兵曰胡廷瑞已得邵武今命湯和又從海上取福州其勢必得既得福建當留兵守要害俾由海道取廣東楊璟兵取廣西既克就以其兵下西蜀中原赤地千里人民艱食軍馬所經糧餉最急當令人往徐邳運糧兵精糧足所向必克卿等以爲何如皆曰善初陳友定據福建乙巳二月侵我處州叅軍胡深往援遁去深追至浦城守將岳元帥拒戰擊敗之遂拔其城四月進攻松溪克之獲其將張子玉其餘衆走崇安深請益兵併攻因規取八閩上許之深進攻建寧陷伏被執見害丙午十二月建寧守將阮德柔來納款諸將請乘勢進取

上曰姑蘇平議之至是出兵友定在福州環城外皆築壘爲備每五十步更築一臺嚴兵以守至是聞我師已入杉關乃留同僉賴正孫副樞謝英輔院判鄧益以衆二萬守福州自率精銳守延平以拒時和等舟師自明州乘東北風徑抵福州之五虎門駐師南臺河口遣人入城招諭爲元平章曲出所殺我師登岫將圍城曲出領衆開南門逆戰指揮謝得成等擊敗之入城拒守是夜叅政袁仁密遣人納款黎明我師于臺上蟻附登城遂破南門和擁兵入鄧益拒戰于水部門擊殺之正孫英輔自西門出走延平曲出搭海木兒杭者不花左丞

鄧任中丞鐵木烈思等皆懷印綬挈妻子遁去叅政尹克仁赴水死行宣政院使朶耳麻不屈下獄死時僉樞密院栢鐵木兒居侯官聞大軍攻城急曰戰守非我得爲無以報國乃積薪樓下殺其妻妾及兩女縱火焚之遂自剄和遣人招諭興化漳泉諸路其福寧州縣之未附者分兵徇之

洪武元年正月楊璟進兵擊永州破其援兵圍之元興化州守將葉萬戶等詣福州降指揮俞良輔守之莆田等十三縣皆降和進攻延平上諭和當以德服人而先已遣使招諭友定友定大會諸將殺使者置血酒甕

中慷慨飲之誓衆死守是時我師隔水而陣分一軍渡水攻西門友定謀于衆曰彼兵方來其氣勇銳難與爭鋒不如持久困之伺間而動必有可勝遂嚴兵巡城晝夜不少息諸將請出戰不許數請不已發怒乃疑其部將蕭院判劉守仁有二心卽收其兵柄殺蕭院判守仁知事急來奔士卒多踰城夜遁自始圍至是凡十日適城中軍器局失火砲聲亂發我軍疑其內叛遂併力攻城友定勢窮蹙與副樞謝英輔叅政文殊海牙訣曰大事已去吾無以報國家惟有死耳公等宜自勉退於省堂按劍仰藥飲之達魯花赤月哈麻具服北望泣拜與

謝英輔皆自經死賴正孫等夜開門出降黎明我師入城友定氣未絕昇出水東門外值大雷雨復甦械繫送京師以唐鐸知府事友定子海聞其父兵敗自將樂來降遂併執送京師皆斬之傳檄至漳州元達魯花赤迭里迷實具服焚香北面再拜持斧斫印章引刀自刎死總制陳馬兒以城降而胡廷美既降建陽即胡廷瑞沐英亦克崇安會兵進攻建寧元守將達里麻叅政陳子琦謀曰東軍驍勇自入杉關諸鎮兵皆望風瓦解鋒不可當今吾城中軍士亦不下萬餘儲蓄尚富可以拒守不可與戰彼攻吾城不克必將自退因而乘之可以得

志衆皆曰然由是備禦甚堅延美等進圍之數挑戰不出我師環四門急攻之達里麻不能支夜潛至文輝營納降詰旦總管翟也先不花亦降于文輝延美怒欲屠其城文輝曰與公同受命至此爲安百姓耳城降欲以私忿殺人可乎乃止執陳子琦送京師招諭汀州等處皆降之二月癸卯召還湯和督海運餉北征軍士命廖永忠爲征南將軍朱亮祖副之由海道取廣東諭曰兩廣之地遠在南方彼此割據民困久矣定亂安民正在今日彼聞八閩不守湖湘已平中心震懾無固守之志若先遣人宣布威德招之必有歸款迎降者可不勞師

族慎勿殺掠沮向化之心如其拒命舉兵臨之扼其險
要絕其聲援未有不下者且廣東要地惟在廣州廣州
既下則循海州郡可傳檄而定海南海北以次招徠留
兵鎮守仍與平章楊璟等合兵取廣西用師方略率用
是道肅靖南服在此一舉復遣李文忠總兵往福建而
楊璟兵由西路進攻永州元守臣鄧祖勝求救于全州
平章阿思蘭遣兵來援璟遣左丞周德興迎擊破之遂
逼永州城鄧祖勝出兵南門拒戰德興又擊敗之祖勝
入城固守璟等圍其城周文貴引兵來援德興又擊敗
之其自廣西來援者往東鄉橋倚湘水列七營軍勢甚

盛呂琛袁子明繫敗之百戶周廸戰死遂遣千戶王廷

取寶慶敗其兵于茱萸灘追至城下周文貴遁去城潰

留兵守之并克常寧武岡二州

洪武二年二月壬戌

勅贛州指揮

陸仲亨等會廖永忠進師三月楊璟進攻全州阿思蘭

遁走降其城廖永忠自福州趨廣東先以書諭其左丞

何真真已遣人求降既抵潮州真別使詣軍門上其印章

圖藉進至東莞縣真率官屬迎見陸仲亨等略定英德

清遠肇慶等郡縣進攻德慶守將張鵬佺遁走遂引兵

會于廣州永忠次虎頭山張元帥以所部降至龍潭盧

左丞納款遣兵破斬偽叅政邵宗迂初宗迂聞王師入

廣州遣其黨羅元祥佯言投降規軍勢而實無降意永忠謂之曰欲降則來毋虛言以相欺也宗迂遷延竟不至永忠知其詐乃下令往攻夜二鼓發兵直抵其寨詰旦破之宗迂據三山寨兄弟俱殘暴嗜殺近境頻被其虐嘗再陷廣州大肆侵掠廣州民尤嫉之及而縛入城民往觀之爭唾其面遂與其徒皆棄市新會縣土豪黃彬河源縣曹文昌及州廖仁等復聚衆作亂自稱元帥永忠復捕誅之南海縣人麥康祖以魔魅壘毒殺人又捕斬之因馳檄諭九真日南珠崖儋耳三十餘城俱不煩兵自下惟海南儋州萬州黎夷洞主未服其後耿天

壁擊破之又招諭諸寇廣東之境悉平遂進兵取廣西
楊璟圍永州久不下乃分命指揮胡海洋等於各門築
壘困之復造浮橋於西江上練習軍士示以必克祖勝
屢戰屢屈至是食盡力窮仰藥死叅政張子賢等猶率
衆拒守百戶夏昇縋城詣璟降因言祖勝死狀夜三鼓
璟督兵四面攻之胡海洋等踰城入子賢復率衆巷戰
天明衆潰子賢與元帥鄧思誠就執并獲其全城士馬
於是來陽等州皆降五月己卯廖永忠朱亮祖至梧州
守臣拜住等迎降進逼藤州元吏部尚書張翔普顏帖
木兒以便宜行省事王師至募人迎敵無應者聞藤州

守臣吳庸以城降乃率所部走鬱林亮祖勒兵追之普
頗帖木兒戰歿張翔赴水死王師駐藤州其潯貴鬱林
容州寧縣及海南海北道元帥羅福等皆降楊璟旣克
永州引兵抵靖江城周德興先已扼險絕其聲援璟屯
北門張彬屯南門六月亮祖復帥師自廣東來會攻之
二旬未下璟曰彼所恃者西城濠水耳乃遣指揮丘廣
引輕兵攻闌口殺守隄兵決其隄濠水涸填土五道與
城接遂克北門月城及水隘復攻其西門不利我軍死
者三百餘人相持兩閱月攻之益力其總制張榮以書
繫矢射營中約降而遣麾下裴觀二鼓縋城出見璟備

言城中空虛可取狀璫乃給白皮帽百餘俾歸爲識約
四鼓入城命指揮吳與寧赴之其平章也兒吉尼出走
被執廉訪僉事帖木兒不花以下皆自殺張彬初攻南
城爲守者所誑至是欲屠之璫下令禁約乃止衆心遂
安戊辰永忠進降南寧左江太平府土官黃英衍右江
川州府土官岑伯顏皆來降戊子阿思蘭以象州降初
思蘭敗於全州率餘衆退保象州永忠遣兵討之師至
賓州其部將李左丞來戰擊敗之思蘭度不能支遣其
子僧保納款至是率所屬請永忠降廣西悉平楊璟還
京而其月友定舊部將金子隆馮谷保復作亂攻將樂

勢甚猖獗千戶宋國成固守賊黨日衆攻益急援兵不至國成棄城遁子隆等遂陷將樂殺知縣馬源等乘勢寇延平指揮羅德聚擊却之不旬日復突至索戰指揮蔡玉奮擊大破其衆追至沙縣子隆等負險拒守建寧指揮沐英遣兵夾攻擒馮谷保時上在汴梁命平章李文忠率兵往討閏七月連破清流寧化諸山寨獲子隆誅之又有陳總管者集餘衆陷同安指揮周淵在泉州往擊馳馬直入其陣斬之復同安南海賊馮蘭作亂縣人關敏倡義擊賊捕百餘人以獻廖永忠遂以敏權巡檢賊卽之聚徒復圍其鄉敏力不能支爲賊所屠永

忠遣兵討蘭斬之贈敏兵馬指揮表其鄉曰忠義闕地
悉平

洪武三年二月遣阿思蘭楊完者不花等持詔諭雲南
日本等國各賜冠帶衣服

附錄

第一葉四行

戴德

德肝貽人開初戰功由都元帥陞指揮副使從取

襄陽及淮北又圍沅州克其城陞湖廣叅政姑蘇

既平從取福建勝進圍建寧克之獲將士萬人所至

皆望風降附調征中原從大將軍下陝西圍慶陽斬張

良臣并克平涼還京受賞卒

追封譙郡伯世指揮僉事

第五行

大事記

卷四

三六

張彬

彬一名斌歷功陞指揮僉事從李文忠鎮浙東破張兵二十萬陞湖廣行省參政守岳州攻下湘鄉

周文貴

走寶慶召還從湯瑄取廣西圍永州敗其援

兵獲卒九千五百

斬部將六人遂取其城連下諸州縣

進攻靖江

凡二月始克之師還調征中原下山西破韓

唐失州

上曰太原之捷得此分其勢亦奇二年從大

將軍取陝西

分兵取唐州敘功被賞久之卒

第五葉第一行

周迪

迪從取江南征湖廣功授百戶丁未冬從征廣西洪武元年進擊永州圍之守將鄧祖勝戰死元兵

自廣西來援駐東鄉

倚湘水列七營軍勢甚盛環遺鐵

撫呂琛指揮袁子男及迪等擊之迪戰死封贈致祭

第六葉第二行

吳與寧

一名永寧國初積功官荊州衛指揮從湯瑄取廣西次永州敗鄧祖勝兵進取全州道州藍山

武岡既克永州直抵靖江

城下凡兩月中有內應

官率眾登城而入執其守將廣西悉平論功被賞

平夏

明王珍

字玉珍

隨州人世農家身長八尺目重瞳以

信義為鄉黨所服至正辛卯汝潁兵起珍團鄉兵屯青

山推為屯長

一日為弓兵從兒輩子為盜輩子即文俊也

明年徐壽輝起新

黃僭號都漢陽來招王珍歸之授元帥隸倪文俊部下

鎮沔陽與元將哈林禿戰湖中飛矢中右目人稱晏瞎

子歲饑乙未春將斗船上夔府買糧已滿

解已屬壽輝

時元

行省右丞相完者都鎮重慶募兵義兵元帥楊漢聞之

帥部下五千至城外單騎入謁留飲酒欲殺之漢覺脫

身走放船下峽

一日漢被殺部下驚潰諸兵復仇

遇王珍訴其事且言

一城並有左丞哈林禿不相下可取玉珍未決萬戶戴壽史曰分兵半載糧還汚半政重慶事濟進據蜀不濟歸無損也從之進克其城完者都夜遁生獲哈林禿父老迎入城玉珍禁侵掠市肆宴然降者相繼獻哈林禿于漢陽進爲隴蜀省右丞戊戌完者都自果州來攻屯嘉定之大佛寺使義弟明二禦之

明二黃陂人智勇過人玉珍愛之妻以弟

婦結兄弟後復姓名曰萬勝

又密遣猛士夜眼陳劫烏斗山寨擒嘉定城皆破之平章郎反輩遁去惟大佛未下相持半載

玉珍親濟師旬日城潰完者都參政趙資走龍州與郎反輩等被獲皆死之人稱三忠道出瀘州自訪元進士

劉禎

禎瀘州人爲大名府經歷罷歸部將劉澤民薦其才用爲參謀遂請據蜀稱大號

喜曰吾

得一孔明也信用之陳友諒既殺倪文俊專政又弑壽輝玉珍遂守夔關絕不與通自稱隴蜀王壬寅三月卽皇帝位于重慶國號大夏改元天統倣周制設六卿又置翰林院承旨學士國子監等官立妻彭氏爲皇后子昇爲皇太子去釋老二教止奉彌勒定賦稅十取其一開廷試賜董重璫等及第出身有差置雅樂供郊祀之祭癸卯命司馬萬勝司徒鄒興及芝麻李三道攻雲南勝獨進梁王宇羅遁走金馬山勝入城據之宇羅復集兵來攻勝敗于關灘引還甲辰萬勝攻興元不克而還

郊興獨克巴州乙巳九月更六卿爲中書省樞密院戴
壽萬勝爲左右丞相遣江儼來通好且獻良馬十月上
遣都事孫養法往報貽以書又聞征南兵多殺掠再以
書戒之萬勝取興元丙午春玉珍卒年三十六玉珍頗
節儉好文學蜀人安之昇卽位纔十歲改元開熙尊彭
氏爲皇太后其都察院官張文炳用事忌萬勝使玉珍
義子明昭矯彭氏旨殺之劉禎代爲丞相吳友仁移檄
興兵昇命戴壽討之友仁曰不誅昭國必不安昭若朝
誅吾當夕至壽乃奏誅昭友仁人朝謝罪四月遣其學
士虞某來聘上命侍御史蔡哲報聘挾一史圖其山

川險易且索大木洪武二年己酉七月關陝平定蜀聞
之懼遣使來貢上答書引公孫述李特孟知祥爲言
勉以善守十月遣湖廣平章楊璟使蜀招諭不從璟還
復以書曉之終不聽洪武三年五月大將軍自將取興
元又遣裨將金興旺張龍由鳳翔入連雲棧合兵進攻
守將劉思忠出降卽以興旺龍守之七月遣使獻木賜
賚之其將吳友仁寇興元擊敗之明日復來攻守兵纔
三千人蜀兵三萬固守發礮石敵多死傷大將軍得報
還屯益門鎮先遣傅將軍來援乃遁上曰此所謂自
作孽不可逭也用兵今有名矣明年正月三日丁亥

上親祀上下神祇告伐明昇命中山侯湯和爲征西將軍江夏侯周德興爲左副將軍德慶侯廖永忠爲右副將軍率京衛荆湘舟師由瞿塘趨重慶潁川侯傅友德爲征虜前將軍濟寧侯顧時爲右副將軍率河南陝西等處步騎由秦隴趨成都 上諭和等曰今天下大定四海奠安惟蜀未平朕以明玉珍嘗遣使修好存事大之禮故於明昇憫其椎弱不忍加兵遣使開諭冀其覺悟昇乃惑於羣言反以兵犯吾興元雖敗劬而去然豺狼之心終懷嚙噬今命卿等率水陸之師分道並進首尾攻之使彼疲於奔命勢必當克但師行之際在肅士

伍嚴紀律以懷降附無肆殺掠昔王全斌事可以爲戒
卿等慎之又命宋國公馬勝往陝西修城池衛國公鄧
愈往襄陽練軍馬運糧餉以給征蜀將士進取歸州閬
三月楊璟兵次夔州大溪口先是蜀人自謂瞿塘天險
遣其平章莫仁壽等守之以鐵索橫斷關口及聞王師
臨境又遣左丞相戴壽平章鄒興副樞飛天張益兵爲
固守計壽等於鐵索外北倚羊角山南倚南城寨鑿兩
崖壁引纜爲飛橋三平以木板置砲石木竿鐵銃其上
傍橋兩岸復置砲以拒我師於是璟遣指揮韋權率兵
出赤甲山以逼夔州指揮李某出白鹽山下逼夔府南

岸以攻南城寨環與都督僉事王簡出大溪口進攻瞿塘
阨江之衆環戰不利於是赤甲白鹽之師亦退還歸
州四月傅友德攻蜀階州克之先是友德陛辭 上密
語之曰蜀聞吾兵至必悉其精銳東守瞿塘北阻金牛
以拒我若出其不意直擣階文門戶旣陷腹心自潰兵
貴神速但患爾等不勇耳友德受命馳至陝集諸道兵
揚言出金牛潛使人覘知青州果陽空虛階文雖有兵
壘而守備單弱遂引兵趨陳倉選精兵五千爲前鋒攀
緣山谷晝夜兼行大軍繼之直抵階州守將平章丁世
真率衆來拒擊敗之生擒其將雙刀王等十八人真遁

去遂克階州湯和亦克歸州烽火山寨分遣南雄侯趙
庸宣寧侯曹良臣江夏侯周德興悉平諸洞寨庸至中
塗而還友德進至文州距城三十里蜀人斷白龍江橋
以阻我師督兵修橋以渡至五里關丁世真等復集衆
拒險都督同知汪興祖躍馬直前中飛石死友德怒奮
兵急攻破之世真僅以數騎遁去遂拔文州 上以湯
和等出師數月未有功復遣朱亮祖來助友德進克隆
州徇下江油彰明二縣選精銳直趨綿州都督藍玉夜
襲其壘守將向大亨驚擾揮兵大破之遂克綿州五月
兵至漢江不得渡乃命軍中造船百餘艘己卯船成將

進兵欲以軍事達湯和而山川懸隔適江水漲乃以木
牌數千書克階文綿州月日投漢江順流下蜀守者見
之皆解體六月壬午友德拔漢州初夏人聞王師至悉
衆守瞿塘以扼三峽之險及聞階文破戴壽乃留鄒興
飛天張守瞿塘而自與吳友仁還援漢州以保成都未
至而友德舟師已逼漢州何大亨悉兵戰城下友德選
驍騎擊敗之旣而壽等兵至友德令諸將曰彼勞師遠
來聞何大亨敗衆已洶洶可一戰克也乃迎擊壽兵大
敗之遂拔漢州壽與大亨走成都臨江侯陳德追擊又
敗之獲其卒三千馬三百友仁走古城友德乃以顧時

守漢州自將擊古城又大敗其衆擒殺二千餘人友仁遁還保寧丙戌上聞湯和等駐兵大溪口欲候水平進師恐其逗遛失事適隆州捷至賜璽書促之曰傳將軍率精銳冒險深入克諸州郡兵已越險次平川蜀人無險可恃正當水陸竝進使彼首尾受敵疲于奔命盪平之期正在今日若俟水退然後進師豈不失機悞事且前日所語爾者獨不記憶乎何怯之甚也廖永忠聞命率所部先進和猶遲疑未決及得木牌于江乃自白鹽山伐木開道由紙坊溪以趨夔州永忠兵至舊夔府鄒興等出拒戰永忠分軍爲前後陳前軍旣接後軍

爲兩翼旁擊之興等大敗明日復併兵攻之殺溺死者甚衆辛卯永忠進兵瞿塘關山峻水急而蜀人鐵索飛橋橫據關口舟不得上遂遣壯士數百舁小舟踰山度關出其上流人持糧帶水筒以濟饑渴永青莎衣象草木色魚貫出巖石間蜀人不之覺也度其已至乃率精銳出墨葉渡夜分兩道一攻陸寨一攻水寨船頭皆鐵裹置火器而前黎明蜀人盡銳來拒永忠已破其陸寨矣俄而將士舁舟出上流者揚旗鼓譟齊下蜀人出不意大駭下流舟師亦進發火砲火筒夾擊大破之鄒興中火箭死飛橋鐵索皆斷擒其將蔣達等八十餘人斬

首千餘溺死無算飛天張鐵頭張等皆遁去永忠入夔
州明日湯和兵至永忠乃與和分道竝進和率步騎永
忠率舟師約會于重慶丙申傅友德進兵成都戊戌文
州復爲丁世真所陷指揮僉事朱顯忠死之友德調兵
來援世真棄城走金州九龍山寨平章俞思中率官屬
軍民二千三百餘人詣友德降己亥永忠舟師抵重慶
次銅鑼峽昇等大懼右丞劉仁勸昇奔成都昇母彭氏
泣曰事勢如此縱往成都不過延命旦夕何益仁曰然
則奈何曰大軍入蜀勢成破竹兵民皆已膽落豈能効
力驅之拒守死傷徒多終亦不免不如早降以免生靈

千鋒鎬昇遂遣使詣永忠軍納款永忠以湯和未至辭
不受癸卯湯和至會永忠兵駐朝天門是日昇面縛听
壁與母彭氏及羣臣詣軍門降和受壁永忠解縛承制
撫慰下令將士不得侵掠撫諭戴壽何大亨等家令其
子弟持書往成都招諭遣指揮萬德選昇等并降表于
京師朱亮祖兵亦至七月庚申友德兵圍成都戴壽何
大亨等出城拒戰以象載甲士列千陣前友德命前鋒
以弩矢火器衝之象中矢還走反蹂壽兵死者甚眾友
德亦中流矢會重慶捷報至壽等得家書聞昇已降而
室家竝完皆無鬪志乃籍倉庫遣子紹發及德許之翊

日壽等率其屬詣軍門降友德按兵自東門入得士馬
三萬壬戌分兵徇州縣之未附者崇慶知州尹善清拒
戰擊斬之判官王桂華率軍民降初保寧城中有韓氏
女年十七遭明氏兵亂慮爲所掠乃僞爲男服混處民
間旣而果被虜居兵伍中七年人莫知其女子也後從
王珍兵掠雲南還遇其叔父贖歸成都以適尹氏人皆
異之稱爲韓貞女 上復命曹公按行四川城池撫輯
軍民分設衛所乙丑明昇等至京師命禮官定受降禮
禮部攷孟昶入宋故事擬昇等於午門外進表待罪聽
宣制釋罪賜冠服引入丹墀聽宣諭 上曰昇與孟昶

不同初專制國政所爲奢縱昇年幼事由臣下宜免其叩頭伏地上表請罪之禮是日昇及其官屬朝見百官稱賀制授昇爲歸義侯賜冠帶衣服及居第于京師丁世真猶率餘衆寇秦州潘指揮堅守五十日旣而援兵至擊走之世真逃山谷自以嘗拒官軍懼不敢出夜宿梓潼廟爲帳下小校斬首來獻中書省奏請行賞上曰殺本管不義何賞爲時吳友仁尚據保寧上諭湯和曰全蜀已下保寧偷旦夕之命乘勢而取無有不克將軍裴徊不進何也和乃遣周德興會傅友德共攻克之執友仁送京師蜀地悉平十月諸將班師還京各上

所佩印綬并全蜀金印冠冕儀仗及銀印五十八銅印
六百四十總制府七元帥府八宣慰宣撫司二十五州
三十七縣六十七官吏將士五萬九百九十人馬騾一
萬三千八百餘疋以吳友仁始冠漢中起兵端誅之餘
發戍徐州劉基獻頌 上親爲文紀功低昂諸將稱傳
一廖次厚資金幣顧時以下遞減湯和十五表裒楊璟
朱亮祖趙庸不賞仍召和及三人列其過皆頓首謝汪
興祖贈東勝侯

第二葉第二十行

蔡哲

哲字思賢武昌人始仕陳友諒為御史歲辛丑

省理

上討友諒拔江州壬寅下南昌哲來歸授江南行

遠遣

子入朝上嘉之擢中書省參政明昇遣使來貢

命哲

報聘因恢漢史同往圖其山川險易以獻吳元年

改授

江西按察僉事陞浙江行省參政復入為中書參

政未幾

出為福建參政召為侍御史洪武三

年以

所舉御史犯法為廷臣所劾坐免官卒

第三葉第五行

金興旺

興旺從取建康積功授指揮僉事遷指揮同知

西運

至華昌三年征王保保為裨將大破之由秦州

南出

一百八渡至喀陽入汴州以克興元留鎮其地陞

都督

僉事明昇將吳友仁來寇出兵擊却之明日友仁

復來

攻與戰而中流矢拔矢復戰斬數百級城中守兵

僅三

千友仁兵三萬以力寡歛兵入城遣使開道走寶

輝取

援兵友仁乃圍城夾溪填塹攻益急嬰城拒守發

巨砲

插石敵兵多死傷者時大將軍在西安得報即率

師還

屯益門鎮先令傅友德領兵三千徑趨黑龍江夜

襲木柵關攻斗山砦下之令軍中人持十炬燃於山友
仁軍見列炬起大驚棄去自是蜀人不復敢侵與
元十一年中原既平論功行賞賜文綺及帛四十四
疋四年征蜀取成都擒丁寇于青州賜白金絲段

第四葉第九行

韋權

權合肥人少好騎射喜兵法元季從軍淮西為列
戰上舉義兵來歸從渡江拔采石克太平破敵

砦定南臺南徐且陵取江右浙西征中原
代西蜀所向有功由指揮陞都督僉事

第十一行

王簡

簡寧州人從渡江歷功陞都督僉事征明昇受賞
以老歸家十三年卒追封霍山侯子虎為指揮使

第七葉第十五行

萬德

德國初從征計以戰功官指揮洪武四年從楊將
軍征明昇連破夔峽諸險要昇出降部送至京賞

青

皇明大事記卷之四終

皇明大事記卷之五

朱國禎輯

平雲南

雲南古滇南有大池曰滇卽以名禹貢華陽黑水爲梁

州

黑水或曰卽蘭滄江巖壑深邃兩山夾流地有黑水

洞或以爲非當是金沙江然西南一帶萬山挿天盤

曲無際水多深黑渡遠遠字亦卽此義禹貢周盟繫濮

以一字體後多以一力一水求此所以異也

時稱萬國來朝南方乃有百國是爲百濮鄩闡國滇也

昆瀾國大理也句町國臨安也牂牁國烏蒙也楚威王

使將軍莊蹻將兵循江上略巴蜀黔中西至滇池以兵

威定屬楚歸報會秦擊楚巴黔道塞遂以其衆王滇變

服從其俗以長之秦使常頡略通道置吏史稱西南夷
靡莫之屬以十數滇最大漢武帝元狩元年彩雲見南
方遣使跡之起于洱河因置雲南郡諭滇王入朝并求
身毒國元封元年司馬遷奉使西征巴蜀南略邛笮昆
明二年司馬相如持節開越檣按道侯韓說開益州授
經教學今雲南有古漢學基是年詔發巴蜀兵擊滅勞深靡莫進
兵臨滇其王來降以爲益州郡賜滇王金印宣帝五鳳
三年遣諫議大夫王褒求金馬碧雞之神光武初年滇
王齊聞道遣使來附封鎮遠將軍成義侯二十七年哀
牢夷賢栗等率種人詣越檣太守鄭鴻降求內屬封爲

君長自是歲來朝貢明帝永平十二年哀牢王柳貌等
率衆內屬詔以其地爲哀牢博南二縣割益州郡西部
六縣爲永昌郡章帝建初二年昆明夷鹵承等應募率
諸郡兵大破類牢于博南斬之封鹵承破虜傍邑侯和
帝永元九年揮國王雍繇調重譯奉國珍寶安帝元初
五年卷夷封離等叛永昌諸夷皆應之衆至十餘萬詔
益州刺史張喬討之喬遣從事楊疎張松楨檣擊之封離
詣疎乞降疎因奏長吏多縱殺死者九十人皆減
死論此兩漢以前之大略也然自漢以後益夷處處
盤據未通中國之先有低多者大者爲山連

今金婦曰沙壹浣絮八口觸沉木若有感生九男曰九

隆族類滋長支裔蔓衍散居谿谷分爲九十九部渠酋

有六各號爲詔夷語詔語爲三其一曰蒙舍詔今蒙化府二

曰浪施詔今浪密三日鄧摩詔今鄧州四曰施浪詔今浪密

和之五曰摩夢詔今建昌唐書曰蒙詔越析詔浪密

果時九隆八族之四孫也強大居昆彌川今白崖傳

十七世至龍祐那蜀漢建興二年諸葛武侯南征雍闓

斬之封龍祐那爲酋長賜姓改曰割永昌益州地置郡

于白崖川仍曰雲南今大理徙居平地建城邑務農

桑諸部於是始有姓氏龍那之十六世孫曰張樂進求
隋開皇中爲太平公史萬歲所破唐高祖武德七年韋
仁壽兵至徙治南寧州諸將皆降遂遜位于蒙氏張氏
或稱昆彌或稱白國或稱建寧其年系莫可詳 蒙氏
始興曰細奴羅九隆五族卒苴蕞之三十六世孫也耕
于巍山之麓數有神異孽牧繁息部衆日盛代張氏立
國號曰封民蒙氏僞稱南詔實唐貞觀三年也遷居瓏
玊山高宗時遣子入侍授巍州刺史死僞諡高祖
稱宗世又稱奇王傳至皮羅閣賂節度使王昱求合六
以爲常詔爲一許之封雲南王賜名歸義天寶七年死子閣羅

鳳襲憤太守張虔陀淫虐攻殺之節度使鮮宇仲通來討大敗于西洱河閣羅鳳因僭號太蒙國十三年畱後李宓兵復至敗沒其後連土蕃入寇神策都將李晟擊破之歷十三世凡三百十年

詳唐書

其臣鄭買嗣奪之

買嗣本唐鄭回之後世爲蒙氏清平官

謂之宰相

三傳歷二

十六年爲節度使楊于真所奪推立清平趙善政凡十月于真又奪之凡二年節度使段思平興師問罪于真走死段氏之先武威郡人有名儉魏者佐蒙氏有功賜名忠國擢清平官六傳爲思平思平生有異兆楊于真忌之使人索捕思平逃匿得奇戟于品甸波大村又

得神驥於葉鏡湖

雲南縣正南大波舖

逐楊氏有其地改國號曰

大理高氏世輔之三傳至素順宋太祖立王全斌下四
川請取大理鑒唐之禍以玉斧畫大渡河曰此外非吾
有也由是雲南不被兵段氏遂得長世焉凡數傳其主
正明爲僧國人奉清平官高昇太爲主凡數年臨終復
囑其子求段氏後正淳立之又數傳曰興智元憲宗二
年壬子遣大弟忽必烈分三道進自臨洮過大渡河經
行山谷二千餘里至金沙江乘革囊及筏以濟進攻興
智及高太祥拒戰大敗興智奔善闡

國中之別都也國都曰草畔

太

祥就擒不屈斬于五華樓下時白日當午忽雲起雷震

元異之曰忠臣也虜興智滅其國得五城入府蠻郡三十有七設大理都元帥府留大將兀良合帶戍守改善關爲中慶路立分省宋度宗咸淳四年忽必烈已立封第五子忽哥出爲雲南王鎮之仍錄段氏子姓世守其土赦興智封爲摩訶羅嵯管領忽哥出死封其子松山爲梁王元季亂中原多故段氏分據之於是有十一總管出焉九代總管段功初襲爵爲蒙化知府明玉真兵三萬來攻梁王及憲司官皆奔威楚諸部悉亂功往救敗蜀兵于開離江再戰不利失驍酋鐵萬戶蜀屯古田寺段兵夕濟火其寺蜀兵死者大半追至回磴關又敗

之梁王深德段功妻以女已而忌功殺之從官員外楊淵海亦仰藥死子寶嗣職梁王七徃攻不克因與講和自趙氏至段凡二千餘年雖通中國授官私改元稱尊號自爲一國國號曰南詔曰大理至元始稱雲南大理實隸之

洪武五年正月 上遣翰林侍制王禕齋詔至雲南招諭曰惟爾梁王把都平章段光都元帥段勝守鎮雲南嘗遣人告諭不意蜀戴壽等扼絕中道致使朕意不達去年與問罪之師明昇出降生擒戴壽遂平其國再諭爾等尚恐未達今因北平送至蘇成稱爲爾等北使之

人復遣往諭朕雖不德不及我中國古先哲王四夷懷服然不可不使天下周知故茲詔諭爾其悉之既至久留不遣卒被殺

七年八月遣故元威順王子伯伯賁詔諭曰爾乃元君遺胤受封西南孤處遐荒不達天命猶未臣服以若所爲貽禍大理之民必終斃于其手何也彼自唐宋以來皆受王封爾元滅其王而統其地彼特劫于勢力不敢輕動今元祚旣傾爾尚據其境土不思改圖禍患之報將不旋踵特遣爾親族宣諭如順天命奉貢來庭皆仍舊官不然朕別遣使者直抵大理依唐宋故事賜以號

令興兵加討內外夾攻勢同拉朽爾其思之又遣故元
官趙元佑張進諭大理宣慰使左丞段寶許以舊封遣
其臣段貞來奉表歸款然以梁王尚強兵不能至密持
兩端後大軍既至不克應又不卽降以至於亡

八年湖廣行省叅政吳雲被逮至京 上素知其才釋
之問曰雲南未臣朕欲以兵取之恐勞師費財以傷遠
人卿能爲朕作陸賈乎雲頓首受命并遣所獲虜使鐵
知院等二十人與俱未至被殺時方捕虜征土番未暇
討也

十四年八月癸丑朔 上諭廷臣曰雲南自昔爲西南

夷至漢置吏臣屬中國今元之遺孽把匝剌瓦爾密等
自恃險遠桀驁梗化遣使招諭輒爲所害罪在必討於
是令諸將簡練軍士先給布鈔治裝凡二十四萬九千
餘人九月壬午朔命潁川侯傅友德爲征南將軍永昌
侯藍玉西平侯沐英爲左右副將軍征雲南 上諭曰
雲南僻在遐荒行師之際當知山川形勢朕覽圖咨衆
得其阨塞今者攻取之計當自永寧先遣驍將率一軍
向烏撒大軍繼自辰沅以入普定分據要害乃進兵曲
靖曲靖雲南咽喉彼必并力拒我出奇取勝正在于此
卽下曲靖三將軍以一人提勁兵趨烏撒應永寧之師

大軍直搗雲南彼此奔命破之必矣雲南旣克分兵徑
趨大理勢將瓦解其餘部落可不煩兵而下師行上
出錢龍江仍勅播州宣慰楊鏗以馬三千兵二萬爲先
鋒又勞金筑長官審定獻馬丁未友德師至湖廣遣都
督僉事胡海洋以五萬人趨烏撒十一月平涼侯賁聚
師趨普定十二月大軍由辰沅趣貴州攻克普定羅鬼
苗蠻犵狁聞風而降至普安復攻下之畱兵戍守進兵
曲靖梁王把匝剌瓦爾密聞之遣司徒平章達里麻將
精兵十餘萬屯曲靖大軍旣至沐英請倍道出不意合
擊友德是之疾進師未至曲靖數里忽大霧衝霧而行

阻水而止則已臨白石江矣頃之霧霽達里麻望見大驚友德卽欲濟師英曰我軍遠來形勢旣露固宜速戰然急則反爲所扼宜整衆臨流俟之達里麻果擁兵扼水上英別遣軍從下流潛渡出其後達里麻急撤衆以禦衆亂英拔劔督師濟江達里麻却數里而陣我師畢濟接戰縱鐵騎搗其中堅大敗之生擒達里麻盡俘其衆縱遺之遂平曲靖友德自擒烏撒分遣左右副將軍趨雲南梁王度不能支遁入羅佐山再奔普寧州焚其龍衣驅妻子赴滇池歿夜入草舍自縊歿癸酉兩副將軍兵至雲南守將觀音保出降明日駐師金馬山舊梁

王闡豎也先帖木兒以金寶來獻玉等整師入城秋毫
無犯并下臨安諸路友德兵循格孤山而南通永寧之
兵遂臨烏撒其右丞實卜遁去命軍士築城蠻寇復大
至友德屯山岡持重以待軍士固請戰度其可用下令
曰我兵深入有進無退彼旣遁而合心必不一并力進
勦一鼓可破若使據險自固未易克也鼓譟薄之其酋
長多中掣墜馬歟我兵益奮疾進蠻大潰走城遂畢工
得七里關以通畢節又克可渡河于是東川諸蠻皆震
懼求降十五年正月元征行元師張麟等各詣兩副將
軍降得其金銀銅印七十四馬一萬二千餘匹壬辰捷

表至先是 上已獎諭曰內使羅信到知將軍調度有方節制嚴整昔定諸蠻俱已奔竄木知此時如何烏撒烏蒙果降否前恐蠻地無糧令將軍分各軍回衛今知資糧于敵軍可不必回也至是又勅曰比聞雲南旣克然區畫布置尚煩計慮前已置貴州都指揮使司然去雲南尚遠今必置都司於雲南以統諸軍旣有土有民又置布政使司及府州縣治之其烏撒烏蒙東昌芒部建昌之地更宜約束首長畱兵守禦禁民勿挾兵刃至如鷩翠輩不盡服之雖有雲南亦難守也又詔諭烏蒙烏撒東川人民苟能洗心效順當一視同仁無有所聞

金朝典駐兵臨安右丞兀朮等來降革宣慰司立臨
安府衛及各府十四衛置雲南都指揮司以都督謝熊
戈豫馮誠署司事二月命都督府選致仕武臣五十七
員分守雲南諸城勅播州楊鏗護送諭水西諸酋長隨
土定疆界置郵驛甲寅以雲南平詔天下乙卯置雲南
布政司改中慶路爲雲南府命汝南侯梅思祖平章潘
原明署司事戊午勅悉達魯長及霫翠入朝己未以張
統等爲叅政叅議等官賦詩二章送之勅諭諸將曰自
古雲南諸夷叛服不常以其地險而遠民富而狠也馴
服之道必寬猛適宜事之委曲不煩朕慮朕當以古人

相期在漢武時始得西南夷終兩漢之世叛者十起光武時將軍劉尚擊之路由越雋其酋長多釀毒酒勞軍因而襲擊尚知之分兵掩捕乃定諸葛亮討平其地因資軍用終不復反亮沒後凡四反張疑一討之軍回復反再討平之唐太宗時雲南自守高宗時人貢待之至重反生侮慢前後九加兵屢戰不勝終不能馭元世祖親下雲南親王鎮守終元之世叛至于七將軍觀此可熟察其情詳慎處置爲今之計非惟制其不叛重在使其無叛耳閏二月竊翠至京賜衣帽及鈔遣還復賜各土酋冠帶給以誥命使任本州知州等官仍諭諸將進

討大理城倚點蒼山西臨河河爲固土酋段世開王師
至扼龍尾關以守藍玉等至品甸遣定遠侯王弼由洱
水東趨上關自率衆抵下關造攻具遣都督胡海洋乘
夜渡河遠出點蒼山後攀崖而上立旗幟昧爽我軍望
見踊躍譟譟會衆驚亂英身先士卒策馬渡河水沒馬
腹將士隨之斬關而入山上軍馳下合擊敵大敗拔其
城段世就擒分兵取鶴慶略麗江下金齒諸夷悉平置
平緬宣慰司以土酋思倫發爲使三月遣兵攻拔三營
萬戶砦更定雲南所屬府五十二州六十三縣五十四
征南諸將送故元威順王之子伯伯及梁王家屬三百

十八人至京賜衣鈔徙居就羅先是 上命友德等雲南旣平畱兵控守要害考元時所畱兵數并計歲用及稅糧徭役之法與事之便宜者以聞至是奏云雲南自元世祖至今百有餘年屢經兵燹圖籍不存兵數無從稽考但當以今之要害量宜設衛戍守其賦稅則故元司徒平章達里麻等言元末田土多爲豪右隱占今准元舊制歲用不足已督布政司覈諸衛所查有見糧一百八萬二千有奇以給軍食恐有不足宜以今年所徵糧并故官院寺入官田與土官供輸鹽商中納戍兵屯田所入并給之 上悉可其奏四月烏撒諸蠻復叛

王闢覽也先帖木兒以金寶來獻王等整師入城秋毫無犯并下臨安諸路友德兵循格孤山而南通永寧之兵進臨烏撒其右丞實卜遁去遂命築城蠻寇大至友德屯山岡持重以待軍中固請戰度其可用令曰我兵深入有進無退彼既遁而合心必不一并力勦之一舉可破若使據險未易克也鼓譟薄之其酋多中槊墜馬死我兵益奮蠻大潰城遂畢工得七里關以進畢節又克可渡河東川諸蠻皆震懼求降

十五年正月元征行元帥張麟及所部詣兩副將軍降得其金銀銅印七十四萬一萬二千餘匹壬辰捷表至

先是 上已獎諭曰內使羅信到知將軍調度有方節

制嚴整普定諸蠻俱已奔竄未知此時如何烏撒烏蒙
果降否前恐蠻地無糧令將軍分各軍回衛今知資糧
于敵軍可不必回也至是又勅曰比聞雲南旣克然區
畫布置尚煩計慮前已置貴州都指揮使司然去雲南
尚遠今必置都司於雲南以統諸軍旣有土有民又置
布政使司及府州縣治之其烏撒烏蒙東昌芒部建昌
之地更宜約束酋長畱兵守禦禁民勿挾兵刃至如土
酋靛萃輩不盡服之雖有雲南亦難守也又詔諭烏蒙
烏撒東川人民苟能洗心效順當一視司仁無有所間

遠不能致以朕心勞之九月雲南諸夷復叛先是諸將
軍分討蠻寇未下者雲南城中兵少土官楊苴最桀黠
給其衆曰總兵領大軍回矣雲南城可圖也各糾衆至
二十萬攻城時城中食少士卒多病倉猝聞寇至頗以
爲憂都督謝熊馮誠拒守修樓櫓備戰具多置強弓弩
于城上賊至輒射之多應弦而斃伺賊少怠出兵擊之
賊不能攻遂連營爲久困計時沐英駐師烏撒聞之選
精騎萬餘來援至曲靖先遣人潛入城報知爲賊所得
詰之曰總兵官領大軍三十萬至矣賊衆駭愕援營夜
遁去至安寧羅次邵甸普寧大禰江川等處據險樹柵

欲圖再舉英至與誠等合兵勦捕之生擒四千人諸部復定誠國用子也十一月置雲南鹽課提舉司梅思祖卒陞吳印張統爲左右布政使

十六年二月友德等遣人送故元雲南右丞觀音保叅政車里不花及酋長段世等一百六十人至京各賜衣服以觀音保爲金齒指揮使賜姓名李觀三月友德等攻蒙化府鄧川州破佛光砦并北勝麗江等府平津等州俱平及車里之外曰八百媳婦皆來附七月勅友德等計處習字九寨及五村大壩卜池等處諸蠻明年三月友德玉班師回京沐英留鎮守

十七年雲南諸酋長來朝貢授官賞賚有差三月兩將軍至論功友德進潁國公祿三千石藍玉仇成王弼先爲侯者加祿至二千五百石都督陳桓爲普定侯胡海東川侯郭英武定侯張翼鶴慶侯皆世襲餘將較皆遞陞大賚加厚士卒悉陞小旗召吳印還京陞張統左布政統請以金銀折糧從之十二月沐英平普定蠻寇移兵剪廣西維摩餘孽通四川糧道上喜曰英能如是朕無南顧之憂矣

十八年正月東蘭州韋富撓作亂討平之英在滇久仍方物定貢額視民數均力役雲南民大賴以安其麓川

緬甸車里八百媳婦等國皆遣使內附 上復置大理
指揮使司命周能爲指揮統兵以守

十九年二月臻洞諸蠻叛復命賴公討平之十二月巨
津州土酋阿奴聰叛襲劫石門關千戶浦泉戰死吉安
侯陸仲亨討破之賊遁山谷間捕獲伏誅

二十年仍舊中鹽則例詔以耕牛萬頭精兵二萬五千
湖廣軍五萬陝西軍三萬三千屯種備征命耿炳文陳
桓葉昇往督之

二十一年正月羣蠻入寇英遣將擊敗之三月英大破
思倫發之衆 上諭英移軍漸逼景東寇若再至去之

遠迂行則用旬月速行又難與戰欲圖萬全須隨地屯田堅壁固壘與之相持以俟大軍四集方可決勝若悔罪納款諭以大義責令償費進馬方許罷兵陳桓師駐畢節命分布耕種六月東川諸蠻復叛頴公會兵討之九月討降越州土酋阿資未幾復叛討斬之置越州馬隆二衛扼其衝頴公還兵湖廣改普安軍民府爲指揮司并于越州西南古魯昌之地置西涼衛于是雲南大定沐公世鎮其地

三十年置雲南提刑按察司初以荒服未設命布政司兼理至是始置司移陝西按察使張定爲之御史姜濬

楊山爲副使監生馮于恭賈興牛廣訓甯溫爲僉事其
軍民重事與西平侯沐春議之

國朝置雲南布政司治于昆明城曰雲南府凡二十郡
左右分畫左曰迤東右曰迤西界以大江東北曰金沙
西南曰蘭滄金沙自北入東海蘭滄自南入南海幅員
不超萬里官軍從大將軍南下及五方之人或以戍或
以徙或以僑寓不歸是曰漢人其生夷地曰夷人夷有

二種居黑水之裏曰爨

爨氏本安邑人在晉時爲南寧太守中國亂遂工鑒中今六涼

有爨王碑云是楚令尹子文之後爨姓玳氏西漢末食邑于爨遂以爲氏其後世爲鎮蠻縣尉晉時有爨深爨

城隍廟在縣故城東北史記漢成封平之唐以縣居黑水之表

曰隹之其音居林下故从隹从人漢之西南驛遠隹夷

昭昭言主人也官屬有明五昭錄昭綱述相臣屬明五

夷餘人實對皆任意昭綱千人逃滅至十人近隹屬郡

縣隹屬屬摩總計夷漢漢人三之夷人七之又分計兩

夷隹人三之隹人七之各府州縣土官至多官巡檢典

史主簿皆世襲加銜至知縣知州指揮權在有司居平

衣食租稅卒有疆場之事則發魚書令帥其部曲以從

然皆夷種編氓也州可出兵四百人縣可二百人其地

南控交趾北接土蕃西擁諸甸東以曲靖爲門戶與蜀

黔錯壤麗江抵角松番烏蠻與霑益如大牙然

土官安舉宗在

元爲曲靖宣慰使其後有祿普妻實卜與哲弟阿哥歸附上授烏撒土知府哥拔霑益土知州傳至安九鼎世繼妻安季儀典州事因以烏撒安紹慶繼傳哲七世孫繼爲人安國正所殺復以紹慶次子効良爲烏撒土知府此烏撒總而霑益繼也

諸夷

自永昌出塞南際大海諸夷自相君長 本朝芟鋤梁段以武臨之皆稽首而奉正朔華其昭網昭錄之舊稱授以宣慰宣撫之新號葉文通于銀臺象馬陳于闕廷版章設于職方紀綱之司屬在行省按籍所載不啻斥地數千里折筭所使並入提封此亦聲教之極盛已然

高廟惡諸夷數叛賜之刀爨斧罕四姓今惟斧姓無存
其它相仍未替至土流並設之法自漢世已然天寶後
守長不法恣肆誅求遂起割據僭竊之禍觀張喬斬奸
猾長吏九十餘人而三十六部盡降諸葛孔明用其豪
傑而財賦足以給軍國史萬歲受明珠而隨服隨叛梁
毗一金不取而酋長咸歸李知古以重賦戮尸張虔陀
以淫虐被殺鮮于仲通徧急而喪師杜元穎高傲而致
亂然則御夷之道顧不甚簡易乎

諸句

其地多土司用事自宣慰宣撫而下長官司巡檢司尤

多曰某甸某甸諸甸皆藏匿山林羣聚雜處喜人怒獸
一言不合則機弩引弓相向死則以財物償之非德化
所能懷柔各長官俱本土羅羅和泥人原無姓名各從
族彙本語定名或隨世遞承其父名之末字更接一字
相呼弘治初知府陳晟以百家姓首二句司分一姓加
于各名之上唯納樓未受其地在郡西南遠者不下二
百里近者百里沐西平入安南蓋取道于此今蓮花灘
之外卽交夷而臨安無南面之虞者諸甸爲之蔽也惟
是流官憚瘴久不履其地諸酋不襲而自寇滯且始相
犄角而漸相傾危遂日尋干戈數十年來廣南沙儂以

征戍竊據其地窩泥弱而無謀爲所并吞官兵討之不
得志各長官寄食如棲苴耳

滇論

劉太僕曰

名文徵號右吾雲南右衛籍大
月人癸未進士歷太僕寺卿

施羈縻于夷

狄非絡首穿鼻之術蓋授之爵賞被之章服俾自爲治
而用夏之變與焉全滇諸夷其麗不億而提其綱領則
自土知府而下數等列完帶者百十人或綰符與銅墨
雕行或捍圉與游徼旅進或沒齒不與期會或經年不
釋介冑深山荒服崩獸角以奉版章棘矢桃弧賈盡怒
而敵王愾無選擇更置之勞有奔走禦侮之効此羈縻

之善物也其或負三苗之固雄夜郎之大跋戾病于指
脛懸疣扼于喉吻潰癰必決而存亡係之矣

銅漏銘

張統

雲南古西南夷地勢既偏晷度必差故觀天之器當極
精緻則民事早晚所開始免疑滯更譙銅漏先總兵官
黔寧昭靖王屢嘗致意而工不稱事嗣侯襲總方面既
得良冶遂繼先志克成茲漏銘曰羲和授時以象觀天
天有二曜與天周旋太陽主晝太陰主夜盈縮永短寒
暑代謝何以則之置此嘉量水注箭浮時乃無妄勿輕
砂末歲功所起差之毫釐謬以千里支干縱橫陰陽消

息天人脗合視此爲則四民之業各守程矩利爾出往
安爾寢處東作西成不愆不忘庶績咸熙家用平康藩
臣施政能知其要九功斯勸茲器之妙

自銘并撰韓宜可銘

王奎

洪武間景章任山西叅政宜可山西布政無何俱以累
謫戍臨安王嘗謀於韓曰吾二人白首相弔以至於今
天將崇茲土爲吾堂若封歟不豫銘之懼世之弗白於
道又懼道之弗白於志也生名奎字景章太原生自號
括之松陽人銘曰箕也不可以簸揚斗也不可以挹酒
漿祗適其逢而繫其庸不規而方惟秉以常將殞質而

連喪抑乘天而耀芒又何必饒饒而較其短長徵以銘
章繁彼之藏韓作而言曰公豫自銘不豫吾銘可乎宜
可吾名伯時吾字號五雲越之會稽人與公同出處也
乃銘之曰惟韓之原本於姬國以爲世愜鴻基宋績肇
啟系相琦二王繩繩以丕緒歷元不競世弗隳先生懋
德執不倚摘姦秉忠神其機致君有道沛以施載厲載
棘氣不萎達生知命壽乃彞我銘其藏永厥期

都御史王啓讀王韓二銘系以詩曰世弗白焉用銘天
將崇茲土死欲畱其名道別各有成男兒當自明君不
見齊有太公望投竿遇主依周葬又不見晉有陶元亮

棄官不仕自作狀我欲滅迹返太初滇陽婺女皆吾居
風塵南北揀不得不作賢臣頌亦無封禪書

黔寧王祠堂碑

王奎

大明麗天萬國明赤符飛騰策六丁惟王翊運天降精
身薄日月騎斗衡坐天張弧擬攬搶助帝肆伐基隆
平氣壓崑崙邊滄溟出入星緯無留行勁涉滇海靡長
鯨長鯨旣殲波浪腥龍蛇走陸殺氣橫噓陽吹陰孰敢
嬰文經武緯光晶熒手揭元會歸虞庭上騎箕尾爲列
星帝錫侈封王黔寧河山帶礪分漢盟堂堂遺像夾
兩楹神光夜夜飛爽靈盼蠻布鳥通杳冥琴麗颯杳從

雨旌倏焉如雲搏紫清八衝鏘然韻流鈴春秋報事垂
千齡

黔寧王廟碑

程本立

上帝有赫降命我明驅除元胡以開太平乃授以臣
乃賚以弼龍興雲從日出燭息勇奮其力智角其能焯
有聲烈則惟黔寧黔寧始生丁元之末筑筑稚年天其
我割匪曰割之實將啓之維皇父之維皇母之長
試以官帳前都尉廣武廣信指揮兵衛皇曰汝來汝
績其凝爲朕腹心爲朕股肱朝夕事朕僉大都督繼陞
同知累階榮祿柱國惟勲西平是封建侯襲爵崇德報

功鐵券丹書金匱石室子孫保之世世無敎既平南與
既定西陲北滅胡虜威行四夷惟彼滇南古之六詔元
有遺孽阻我聲教 皇曰西平爾副征南彼蛇彼締爾
劉爾龍樓船蔽江師三十萬乾旋坤迴山擘濤溟悠悠
牂牁我我格孤羅鬼仡佬傒我而蘇彼昏不知擁兵曲
靖敢竭我師罔畏天命我師其行如電如雷大戰白石
手縛其魁載厲我兵載秣我馬直入滇池如裂其瓦元
之遺孽破卵覆巢父老歌舞迎師於郊段世亦擒罔有
不服班師振旅獻俘授馘摩娑施順望裸芒河尋傳漢
裳婆羅秦婆烏蠻白蠻東爨西爨穿鼻長髯黑齒繡面

麗水金甌朱提銀流白雉孔雀馴象犀牛一百八區三十六郡七十城門八百媳婦版圖既入職貢是修大開明堂萬國來朝 皇曰斯民悉朕赤子一視同仁無間遠邇詔汝西平其填撫之以燠其寒以飽其饑西平奉詔稽首以拜夙夜兢兢罔敢或懈摩拊吹煦於懷之孩艾夷蘊崇於田之萊於羊於狼以膺以磔於稼於苗以膏以澤以興庠序以敦詩書農隙講武夏禮變夷夷人有言我亦人類遠於恩化弱肉強噬今也奚幸昔也奚辜子有其父婦有其夫夷人有言我枵我羸西平哺我西平緒我西平曰吁茲豈在予維 皇之命維 皇之

謨天胡不仁奪我父母擗踊而哭匍匐而走九重眷注
一日哀聞驚慟輟朝諭祭以文數備禮祭有誄有謚王
以黔寧侯其冢嗣黔寧始薨人莫不哀嗣侯既至人莫
不懷江寧之岡有鬱其兆夷人不忘滇則有廟金馬左
立碧雞右昂千萬斯年以祀我王

平國使王翰林文

張 統

皇明建號之五年洪武壬子羣雄耆定光嶽混合乃睠
西南獨阻漸被 詔翰林侍制臣禕爲正使往諭之遇
害又八年辛酉天兵南下踰年壬戌雲南平平之日統
備員政闕再閱十五年爲歲丙子第二子紳仲緒來訪

公殯思欲見之夢寐驗以血肉而陵谷已非蹤跡莫考無以致其情悵乃至就盡之所撫地長號載其諱字位望以歸統弔于次仲縉泣且言曰紳在襁褓先子以去家後有書自普定來以續大事記爲囑乃此行絕筆悵悵在心竟不得接其應響痛哉天乎夫何不孝至于此極也統謹以禮慰之曰先王之制卽遠而志于墓送終之事盡矣故至孝者不于其體魄而享于廟廟之有主神之宅也今子迎神以返于義爲盡况青春受謝白日昭只公之魂魄必有已散而未盡者及此時招之宜其感而遂通不遠伊邇子又何恨仲縉因以公之家乘見

示且請更有所言竊惟公以文名擅海內早歲薄遊迄
無所遇此非才之不足也顧其內介而外方有齟齬焉
其道難進其節不苟非養之有素者不能如此是以一
旦涉異境蹈危機奮不顧身聞命卽行與顧婢子語不
能休者異矣當其鑿空而往跋涉畏途猶拳拳焉以續
大事記爲念夫大事記乃尚論古人賢否得失之言也
書法精密炳炳如丹然則公之自處又豈有不審者哉
故或人雖加蔽匿而義不苟免卒慷慨就死蓋公之致
身委命不在于臨難而其平時固已判然于胸中矣嗟
乎事之不偶乃期運之未至或機會之難合君子固有

不幸焉若遽以成敗爲優劣則蘇屬國有媿于陸賈顏
魯公與終軍不可同年而言矣其可哉統卽弔祭遂申
之以文曰訪前修之遺烈今在西南之天涯路漫漫其
修阻兮魂杳杳其曷追羅蕙肴與桂醑兮集衆美以爲
儀藉芳馨以比德兮庶英爽之在茲公之眞潔世所信
兮琢白璧爲肺腑濯江漢而暴秋陽兮肯自浣乎塵土
製雲霧以爲錦兮又重之以黻黼擘星辰以耀芒兮宇
宙軒豁其在手顧食焉而弗避兮斯大義之所存載使
節以馳騁兮往振策兮南雲嗟期運之未至今遇豺虎
之信信彼徒知爪牙之可以逞惡兮又安知天命之維

新人固有一死兮死固各以其仁惜芝蘭之見摧兮終
腐朽于荆榛委蟬蛻而不顧兮挾浮雲而上征駕雷車
以飄忽兮引彼煥赫之霓旌逐飛廉而東驚兮歷倒影
以憑陵過蒼梧之曠漭兮謁重華而是止愛傳說之有
託兮亦徘徊于箕尾望故鄉而掩涕兮予豈能獨昵夫
山鬼吁嗟歸來兮公不可以久留懷猿吟與鶴飛兮兩
浩蕩而難儔將速返于故居兮寧爾宅之深幽有子有
孫善繼而善述兮長致享于春秋

雲南水路

武定尋甸姚安楚雄北勝安寧或瀕金沙江或有小溪

流入江皆可行舟以爲馬頭正統間王靖遠驥會議開
金沙江嘉靖間毛僉憲鳳韶力主其說皆爲武定土酋
所阻而隆慶間陳都憲大賓再議踏勘以江中一處有
石橫亘可焚鑿爲報又以所費不及萬兩三月可以畢
功蜀商販大木者迭又多自姚安北勝順流東下略無
阻礙時又有阻者中止夫滇蜀俱古之梁州昔人謂南
中爲蜀之苑囿兩省原自相通宋將狄青曾繇廣西追
儂智高至大理則雲南與廣西亦非阻絕異域欲安滇
以制夷則陸路通廣西四川者當開一開則滇夷無可
恃卽有變動我分道可以進攻川貴夷獠有緡亂犯順

者滇兵亦可以拊其背而襲其後矣水路通馬湖大江
順流直達兩京各省者當疏一疏則不惟滇夷失險不
敢跳梁卽有干犯我舟運糧源源而來士免枵腹之虞
亦可盡力然水源及支流甚雜夾岸皆高巖叢葦下渡
如經甌釜炎熱多瘴終不可行也

黑水辨

李元陽

書禹貢黑水西河唯雍州華陽黑水唯梁州又曰禹導
黑水至于三危入于南海傳論紛紛或謂其原出某山
流逕某地或謂其跨河而南流或疑其世遠而堙涸或
謂三危在今麗江或謂窰三苗不應復在南夷之地當

何所據夫黑水之源固不可窮而入南海之水則可數也隴蜀無入南海之水唯滇之瀾滄江路江二水皆繇吐蕃西北來蓋與雍州相連水勢並洶湧皆入南海是豈所謂黑水者乎然潞江西南趨蜿蜒緬中內外皆夷其于梁州之境若不相屬惟瀾滄縣西南迤邐向東南徘徊雲南郡縣之界至交趾入海今水內皆爲漢人水外卽爲夷緬則禹之所導于分別梁州界者惟瀾滄江足以當之孟津之會曰繫人

在北勝

漢人

在順寧

以今考之

皆在瀾滄江內則瀾滄江之爲黑水無疑矣地理志謂南中山曰昆彌水曰洛山海經曰洱水西流入于洛故

瀾滄江又名洛水言脉絡分明也元史至元八年大理
勸農官張立道使交趾並黑水跨雲南以至其國觀此
則瀾滄之爲黑水益章章明矣若三危山卽不在麗江
當亦不遠古今山川之名因革不可紀極夫不可移者
山川之蹟也隨時異稱者山川之名也不據不可移之
蹟而據易變之名亦末矣大都爲論傳者未嘗知三省
地形但謂隴在蜀之北蜀在滇之東北而禹貢言黑水
爲梁雅二州之界又入南海故不得不疑其跨河知跨
河非理又不得不疑其堙涸曾不知隴蜀滇三省鼎足
而立隴則西南斜長入蜀滇則西北斜長近隴蜀則尖

長入滇滇隴之間正如三足旒然黑水之源正在旒頭
故雍以黑水爲西界對西河而言也梁以黑水爲南界
對華陽而言也蓋各舉兩端若曰西河在雍東黑水在
雍西華山在梁北黑水在梁南云爾故曰梁州可移而
華陽黑水之梁不可移也梁雍之間其名黑水者非一
然皆枝水而流又不入南海諸葛亮箋所謂朝發南鄭
暮宿黑水之類皆非禹貢之黑水也元遠都實因河之
流以窮河源遂得其實事固有晦于前而明于後者今
能因瀾滄江入南海之流而窮其源則所謂黑水者可
知也

濮考

董難

牧誓庸蜀羌髳微盧彭濮人傳曰庸濮在江漢之南疏
曰此八國皆西南夷也逸周書伊尹爲四方獻令正南
百濮爾雅南至于濮鉛鄭語叔熊逃難于濮而蠻楚蚡
冒始啓濮劉伯莊曰濮在楚西南左傳巴濮楚鄧吾南
土也又云麋人率百濮伐楚通典有尾濮木綿濮文面
濮折腰濮赤口濮黑黠濮周書王會篇卜人以丹砂注
云西南之蠻蓋濮人也諸濮地與哀牢相接哀牢卽今
永昌濮人卽今順寧所名蒲蠻者是也濮人之俗用麋
尾末椎其髻且好以漆飾面通典所云尾文面言其飾

也木綿卽攀枝花濮地多產之可以夾纊言其居產被服也折腰濮人見尊者則折腰以趨言其禮俗也赤口濮人調舌爲音如鸚鵡然言其舌聲也黑黧其色多黑言其種類也濮與蒲字音相近今謠爲蒲耳或以全滇之地其人百種槩名百濮甚謬濮白所居連壤以白音按之濮字在白音合于一屋謂蒲字在白音合于七虞韻白語稱其人爲濮而不稱爲蒲是一證也又濮俗截大竹爲筒以注水謂之濮竹如聊筒之得名以此驗之益明今之論百濮者旣不得其地又不得其音訛以傳訛如此

孔明

孟獲據佛光寨去大理百五十里守關隘諸葛武侯南征不得入乃繇漾澤而北破佛光駐軍大理盡覽形勝以定規畫後有壇壝名祭天臺父老相傳爲武侯祭天畫卦之所遺跡宛然初南征時後主賜金鉞一曲蓋一前後葆羽鼓吹各一部虎賁六十人備有王者儀衛遂得攝以祭天按卦畫陣圖自南中始圖成神光燁然蓋武侯遺蹟在滇者最多廟祀處處有之

傅公父子

潁國公傅友德祠于雲南額曰報功凡四子第三子添

錫字佑之元末大亂與父相失貌雄偉善經生業家杭州爲張兵所執尋得脫李曹公兵至投之授明州訓導僧機先引倭來襲先以詩通覺其謀言于州將設備誘縛機先以功陞知大名府元孽犯城任甫七日備未具出走下獄赦出安置雲南之永平擢大理衛知事未幾普安賊叛督兵與戰不利死之士人塋驛後立祠以祀子寬寬生瑄瑄生澄教諭江安生工科給事中良弼蓋穎公之的派也

儒儒

僧廣度原名曾仰中雲南嘉靖甲子鄉試知楚之盧溪

縣致仕歸精研禪理號卓然子一旦忽有悟祝髮棄家
住香林水月兩寺萬曆庚子杖錫禮峨眉普陀諸勝至
杭之雲棲寺依沈蓮池受度今名過盧溪邑人以舊令
故攀留供養忽感微疾預知逝期脩然而化黔撫郭子
章贊其像曰僧而帝創業之明主帝而僧建文之寄
寓僧而侯虎丘之廣孝令而僧滇池之廣度蓋自古王
侯皆然而何分于玉輅韋布公起儒紳出長民庶已趨
寂教忽焉頓悟普陀加鞭雲棲解屣遨遊五老至止三
顧雞足卓錫大酉軒翥乙未而生癸卯而故盧溪而仕
盧溪而住將華藏海會之赴而何心于金馬碧雞之駐

將諸上善人之與聚而奚羨夫震旦五濁之屬嗟嗟廣
度從今大寤神留水月萬年旦暮

紀山

雲南另闢一天至 國朝始入職方山水至多至奇不
可勝紀惟著在人口若記載者稍稍摘出備考

碧雞山在省城之西滇池之外一統志云蒼巖百仞綠
波千頃月印澄波雲橫絕頂可貌其大都矣 金馬山
在省城東二十里蜿蜒幽異綿亘數十里至於古城乃
爲息壤有泉出於山椒嘗有金馬隱現故名又曰呼馬
相傳前代取經以馬負經至此馬逸呼而得之故曰呼

馬左思賦曰金馬騁光而絕景碧雞倏忽而雖儀又似
指馬色雞羽者顏師古曰金形如馬故曰金馬碧形如
雞故曰碧雞 距金馬山三里曰鳴鳳山舊名鸚鵡後
改之評其勝曰山光靈異景物歲幾遠之九龍奔朝近
之雙鳳翔舞玉泉環帶碧潭綰轂 嵩明州東二十里
曰秀嵩山頂如偃月環州之山皆在其下俗稱搖鈴山
孟獲嘗立寨于此 國初尚書吳雲死難處南一峰曰
小秀嵩 點蒼山在大理府之北倚山而城有峰十九
有溪十八界在兩關之間條岡百里周迴萬步五月積
雪皓然人取以食山腰白雲如帶蒙氏封爲中嶽漢書

注山似扶風太乙之狀上有馮河中多白石穴而取之
如切肋白質黑章片琢爲屏有山川雲物態唐李德裕
平泉莊醒酒石卽此產也嘗有人畊地得石上刻三字
曰靈鷲山又他山曰青巔曰雞窠曰玉几曰羅筌曰曩
蔥曰龜山若拱若揖西向點蒼皆多石窟東北一百
里曰雞足山名山記爲九重巖岡巒奇詭三支如雞距
上有華首門袈裟儼然關戶有如城闕入定之所人莫
能通佛刹非一其大者七十三寺仙靈所居世傳佛大
弟子迦葉波守佛衣于此以待彌勒

佛家言雞足
實在西域

趙

州南四十里曰昆彌山卽白崖山西平侯更爲定西巔

浪穹縣東北四十里曰蒙次和山三面險峻一面臨河六詔時施浪詔居焉曰蓮花山其狀酷似山麓有浮圖傳云唐三藏法師所建以鎮紅孩兒之恠南二十里曰畢鉢羅窟山在白崖山西一名賓波羅窟巖巒聳拔千餘丈其下林麓蒼鬱南詔時有杜老蠻者卽崖而寺上有獨木仙橋其木非常每月十五夜橋木自換又有奇樹名菩提樹亦名思惟樹西陽雜俎三畢鉢羅樹出摩伽陀國佛光山在臨安河西縣西十里形圓如佛于此立砦嶄然險絕山半有洞可容萬人巖岬山在蒙化府西北三十五里蒙氏龍伽獨自哀牢將其子

細奴邏徙居於此築巖岬圖城自立爲奇王號蒙舍詔

上有浮屠 澂江府路南州北曰關索嶺嶺有關索廟

上接玉筍山下瞰撫僊湖

湖週三百餘里北納諸溪南受星湖玉筍山撫其上關鄒

若僊人東會鐵池盤江而達南海星湖周八十餘里相傳關漢壽亭侯之子從武

侯南征凡鑿山通道多用其力歿而祀之在尋甸者稱

英烈侯在江川者稱龍驤將軍

成化八年有虎爲患大監錢能禱神獲虎因新

其廟蜀志稱關公與子平同被難于臨沮子興嗣字安國

少有令問丞相諸葛亮深器之弱冠爲侍中監軍數歲

卒南中所祀當卽是興今黔中安莊衛亦有關索嶺其

西有驪甲巖下有馬跑泉皆昔時遺蹟尋甸新興徵江

江川所在皆稱關索夷語呼索華言父也

紀水

滇池在省城西南周五百餘里又名滇南澤合盤龍江黃龍溪諸水其池源廣而末狹有似倒流故曰滇漢武帝鑿池于長安習水戰倣此也池北受水而傾西南爲海口北入富民縣滙廣超塘赴金沙江西湖在上流又名積波池周可五里東五百里曰盤龍江發源自嵩明州故鄧甸縣山中九十九泉合流西注曲折而南入滇池西南八十里曰海口以滇池滙諸川之水至西惟此一河泄之若咽喉然沿海財賦歲以萬計其利害繇於

海口之通塞歲一濬之 西洱河在大理府城南一名

昆瀾池亦名瀾海卽水經所稱古葉榆水也源出浪穹

縣罷谷中山下世傳黑水伏流別派自縣西北來滙於

縣東爲巨津形如月生五日抱珥之狀故又曰珥河逮

縣西南繇石穴中出又會蘭滄江而入南海水中有三

島曰金梭曰赤文曰玉几水涯有四洲曰青莎曰大鶴

曰鴛鴦曰馬簾凡九曲皆可田可廬而大鶴洲隨水升

沉如世稱鸚鵡洲然又有十八溪源自點蒼山椒懸瀑

注而成同入洱河

河多毒龍往往覆舟神僧道安結庵其上夜見童子百餘人語曰師至吾

屬不安盡遷去師厲聲曰是法住法住安從遷明日水

死燼百餘其患乃息因創羅荃寺寺西有觀音閣懸

崖結構海崖如
鏡又名天鏡潭

白石江在曲靖府北八里地多青石

惟此獨白 蘭滄江在蒙化府城南一百五十里源出

雍州南吐蕃鹿石山本名鹿滄江後訛爲瀾滄今又訛

爲浪滄南流入永昌雲龍州順寧景東元江交趾達南

海蒙氏四瀆之一 潞江在永昌府城南一百里又曰

怒江水經注云漏江訛爲露源出吐蕃流經芒市兩崖

陡絕瘴癘甚毒秋夏不可行至木邦地名喳嘿江又流

經八百車里地至擺古東入南海蒙氏四瀆之一 盤

江有三其一在霑益州蓋雲貴必由之路江有二源北

流曰北盤南流曰南盤環諸山各千餘里至平伐橫山

寨合焉州據二江之間一在阿迷彌勒二州分畛處源
自新興州經建水衆流所匯瀾漫浩蕩一在宜良縣曰
大池江從澂江府舊邑市縣北流入縣境盤折六十里
過鐵赤河至蓮花灘入交趾 金沙江源出吐蕃共龍
州犁牛石下謂之犁水訛爲麗佛經云拔提河一名金
河池山海經曰黑水之間有木名曰若木若水出焉卽
其地也濱江產黃金綠玉琥珀之類東至巨津寶山三
面環麗江至鶴慶受漾共江諸水又東經北勝受桑園
龍潭程海諸水又東經姚安受蜻蛉大姚龍蛟諸水又
東經楚雄定遠縣受龍川諸江水又東至武定元謀縣

受苴寧河又東至祿勸州受滇池海口青魚塘甸基武
七三泊始甸螳川後甸松坪祿脹雨屯羅次石門五道
河羅畝大石壩富民赤舊壩普渡河廣起塘諸水又東
經會禮州受寧遠越溪雙橋長河瀘沽打冲東河熱池
諸水又東經川濟慮部過烏櫟山受尋甸牛欄江壁谷
川齒化溪諸水又東經烏蒙南又東經馬湖受尼溪大
小紋溪諸水又東至叙州府入於岷江此爲北金沙環
繞雲南境中至于南金沙源出崑崙山西北較北金沙
瀾滄潞江更荒遠上流已濶澄若重溟黝然深碧夏秋
漲溢江色不變近大宛國自里麻茶山至孟養極北不

聞所往號赤髮野人境峭壁不可梯繩弱水不任舟楫
惟遠見川外隱隱有人馬形殆西羌之域今只就孟養
以下可見者言之合大車江大盈江方名金沙卽王靖
遠追麓川戰處南入甸海北金沙乃元取大理革筏所
渡處自四川行都司會州建昌烏蒙馬湖入江惟支流
入雲南蓋南金沙入海爲大北金沙入江爲小截然兩
江非一也楊升菴宿金沙江詩曰往年曾向嘉陵宿驛
樓東畔欄杆曲江聲徹夜攪離愁月色中天照幽獨豈
意漂零瘴海頭嘉陵回首轉悠悠江聲月色那堪詭腸
斷金江萬里樓

大江源出城都府茂州之岷山州在府西五百里山在州之列縣村直上六十

里江水出焉故曰岷江經州城西南至威州
汶江汶岷聲近古立為郡非誤也轉而東南
金馬口至新津溫江二縣由嘉定州忠州萬州經敘州
城東其南有馬湖江來合即金沙江也嘉陵江源出
陝西鳳縣過劍州自保寧府東至合州釣魚山下入馬
湖江金沙源自吐番經沅黎至東川軍民府西南二
百里至雲南尋甸軍民府百夷夾江而居歷諸郡至敘
州會岷江下匯塘合三江觀之則升菴之詩方有味其
形勢宛然在目金沙江之源委亦明

烏蒙界有牂牁太守陳立祠立以金城司馬漢成帝河
平二年為守時夜郎王與

與句町王禹漏臥侯俞相攻論
解不從立至討與殺之二人降
莊蹻留王滇置且蘭牂

牁國漢立牂牁郡史記正義曰崔浩云牂牁繫船棧也

華陽國志曰莊蹻伐夜郎軍至且蘭
一曰且蘭有城莊蹻所築在省城北

十餘里又
名穀昌城
楸船於岸步戰既滅夜郎以且蘭有楸船柯

心軍已
卷九

處仍改其名爲牂牁牂牁者立兩椿於兩岸中繫以繩
舟循繩而渡蓋其水迅急不容持楫今貴州盤江崇安
江皆然 昔渡河在勸祿州東北渡處形如獅子又名
獅子江 大渡河源出鶴州至黎州九十里東注嘉定
入于岷江雅州有大渡水在蘆山縣北四十里邛縣蘆
山必由之地故曰大渡舊設大渡縣東南入南安縣羅
平州西南二里亦曰大渡河 可渡河在四川烏撒府
出山谷中清而駛梁以巨木橫溪上曰可渡河 七星
關在烏撒府城東南一百七十里頂有七峰自周泥山
趾陟巔窮日乃至水注于陸廣河爲滇蜀要津 建昌

會川衛中道曰綠廠有銀井西北至抱松營始遡孫水

孫水亦金沙江之別流繩水孫水淹水瀘水大渡水諸水沿注通爲一津卽若水也東流注馬湖江諸葛武侯

南征渡北水出臺登縣南至會無入若水臺登卽瀘沽會無

卽元謀也夾岸皆崇山羊腸百轉遡流而北高下因山

縈曲因水陵谷間絕者爲危橋以渡水蝕山趾石齒殫

殫者不可通輪蹄或行水中夏秋瀑漲則道斷山水稍

衍之地爲營哨環重垣塹深隍爲草屋以居戍卒恒有

水災水之東爲猓西爲番猓屬皆椎髻被氍毹持刀盾

番屬居碉房髡頂挾弓矢出掠無時北至白水歷觀音

半站營有橋曰小高橋河西有德昌所產美材賈人販

之一版十金者至汪南可百金又中產不燼木其物得
於山谷石脉中掘深丈許非石非木堅而且白鑿之綿
綿不斷如絮績以爲帔投火不燼名曰火毳漢桓帝時
梁冀作大浣布單衣會賓客行酒公卿朝臣前佯爭酒
失杯而汗之冀僞怒解衣燒之布得火燂然而熾如燒
凡布垢盡火滅絜然潔白如水澣卽此神異經曰南方
有火山長四十里廣四五里生不燼之木晝夜火燃得
烈風不猛暴雨不滅火中有鼠重百斤毛長二尺餘細
絲恒居火中時時出外而色白以水逐沃之卽死績其
毛織以作布若汗以火燒之卽清潔也 建昌衛有卽

池卽古邛都一曰邛河縱廣岸二十里深百餘丈魚長
一二丈頭特大遙視如戴鐵釜李膺益州記云邛州都
下縣有一老姥家貧孤獨每食輒有小蛇頭上戴角在
林間姥憐而飴之後稍長大遂長丈餘縣令有駿馬蛇
吸殺之令大忿責姥出蛇姥云在床下令卽掘地愈深
愈大而無所見令又遷怒殺姥蛇乃感人以靈言瞋令
何殺我母當爲母報讐此後每夜輒聞若雷若風四十
餘日百姓相見咸驚語女頭那忽化魚是夜方四十里
與城一時俱陷爲湖土人謂之陷河惟姥宅無恙迄今
猶存漁人採捕必依止宿每有風浪輒依宅側恬靜無

它風靜水清猶見城郭樓櫓晏然今水淺時彼土人沒
水取得舊木堅真光黑如漆好事者以爲枕相贈 湯
泉甚多在宜良縣西三十五里者酷熱如百沸之湯又
有可燂羊豕者龍泉龍潭龍井有一府至十數處爛柯
山孔明遺蹟在在有之其秀鍾爲珍寶爲仙釋爲人物
而不勝瘴厲產爲異種也

朱史氏曰天下大矣神禹平水土九州內外度無所不
遍然只畫爲荒服俟後王各差其德力爲廣狹旣盡人
工亦終聽天數故自夏殷而後萬國縮爲八百兼并旣
多儘有遺于王化之外者春秋時伊洛有戎決非侵而

透入當由威而內遷事不可攷風亦漸移聖人始下謹
嚴二字視太古之伾伾僚僚何如哉秦混六爲一所謂
三十六郡者半屬羈縻漢有中原至武帝始廣遂苦虛
耗由唐迄宋北西南三方之戎日強日蝕內地至元胥
天下陸沉而後我聖祖興焉驅逐有滿包舉無遺而
又截然畛限煥然文明西北非郡縣之地只有固圉雲
南有山川之奇編同內服傳之二百餘年事變屢更英
烈不替雖金沙一帶鞭長難及而十二郡與各軍州尚
遵聲教且從此整頓舊跡可尋卽不爲王靖遠獨不可
爲主三原乎故稍詳之以補地里之缺云

世宗之五終